


SINULO, KAUHANYO YABUNE

KALULO YA I

 Amen. Kulumbwe Mulena. [Hakuna manzwi fa tepu—Mu.] . . . -yena kasibili. Ni sepa kuli boo kona buino bwa batu babañata. Ki nto yende luli, kezeli yomunyinyani foo, timana ya mafelelezo yani. Ni itumezi hahulu ka seo. Mi luna . . . lu taha mwa busihu bwa Silimo Sesinca ha Ni sepi kuli mwakona kuopela sika sesinde kufita foo, ku zamaelela ni busihu bwa kacenu.

² Ku bonahala kuli lukala silimo hande luli; uh-huh, ki bunde ni litwa ni mbundu kwande, kona Indiana yeo ka nako ya silimo ye. Kacwalo mina sicaba sesi zwelela kwa Georgia Na bona kwanu, mi ni kwani kwa Ohio. Cwale, Muzwale Dauch, wena ni Kezeli Dauch mwa ziba cwalo, sina Ohio ha li swana. Mi . . . kono, luya kwa Naha ko kusike kwaba ni yeñwi ya zeo. Uh-huh. Yeo kona taba.

³ Bo ki busihu bwa Silimo Sesinca, buitukiso. Mi, kakuli, mañi ni mañi una ni buitamo bo bu ñozwi ni buitamo bo mu kaeza bwa Silimo Sesinca, mi mwendi kamuso muñwi cwalo kaufela li ka sinyeha fela. Mi kacwalo, mwa ziba, mu apula likepe lelinca mwaha ni mwaha, mi ni kukuta kakusasana habusa, ni kukutela fateni hape.

⁴ Kono kuna ni fela nto iliñwi ye—ye Ni tabela kubulela, mi yeo ki yona sina Muapositola Paulusi yana ize, “Ni libela lika ze li kwa mulaho, mafosisa aka kaufela ni lika kaufela ze Ni ezize, Ni itiisa kuya kwapili kwa pizo yepahami ku Krete.” Boo kona fela buinyazo bo Ni nani ki mafosisa aka ka mwaha o felile, ni kalulo ya bupilo bwaka ya kale, mi Ni Mu kupa fela ka buikokobezo kuli anife sishemo hanze ni ikataza kuya kwa pizo ye pahami. Ni sepa kuli boo kona bupaki bwa—bwa luna kaufela, ne lu ka ikutwa cwalo.

⁵ Mu ni swalele kuli ki busihu bo bu maswe mi—mi sicaba ha si si ka taha. Mi Ne ni bizize Muzwale Neville, Ne ni sa zibi mane kuli na ka taha kwanu kamba nee. Mi kipeto Muzwale Skaggs a taha, mi ataha kuzwa kwa Kentucky ko kuna ni litwa mwendi liñokolwa zetalu kamba zene kulo kwani. Mi kacwalo . . . Kamba, “Sina *cwana*,” na ize, kuli nana ni mulimi yana mu hohile linako nyana ni ku mu lobaza fa lilundu kuitusisa tirakita. Mi kacwalo Na hupula kuli, “Kihande, haiba ki mainci amabeli kamba amalalu fela, haluna kubilaela ka zeo, uh-huh, haibile fela ki cwalo.” Kono mikwakwa ya fiteha mi mañi ni mañi wa zwelapili kuyona.

6 Cwale, eeni sha, busihu boo ki busihu ha lu utwa ka kuba ni bakutazi babañata, ba bashutani, babatile. Mi ba taha kuzwa kwa libaka zeshutana busihu cwana, kufita fahala busihu. Ni sepa kuli ba ka ina ni kubona haiba . . . kuitela Mwaha o Munca wakona ufele . . . utaha, ni wa kale ufela. Mi hañata ba bizezanga kwa katala ni kulapela ni—ni kueza buitamo bwa bona ku Mulimu ni ku ncaafaza buitamo bwa—bwa bona.

7 Ne ni bulelezi Muzwale Neville . . . Mi Na mu biza kubona haiba na taha. Se nili kambe na si ka taha, Ne ni ka lika kueza zende ze Ni kona. Mi cwale haiba hakoni kufita kwanu kakusasana, kupalañi, Nakona kuzwelapili kueza kaufela ze ne Ni kona ka nako nyana hali—ha li siyo. Mi Na mu bulelela kuli Ni ka lika busihu bwa kacenu, ka kunahana fela kuli ni na ni liñusa la mizuzu fela ye lishumi ni ye ketalizoho, kamba nto yeñwi. Mi, lu bona kuli muna ni bakutazi babañata nyana babaliteni mo, baba libelezi.

8 Kacwalo Ne ni . . . hupula kuli Ni ka kalisa fela ni kuzwelapili mwa Buka ya Sinulo ye, muzwelepili fela kushetumuka, munge kauhanyo ya 4 cwale, mukalise ka yona. Mi haiba haluna kufeza ka zona nako ye, nako yetatama lu ka zwelapili. Mi lu ye ku ya 5, ni ya 6, mi ka mo lu konela fela. Mulena alu tuse kuli lufite ku zona.

9 Ni bata kubulela kuli, lu si ka kalisa kale, kuli nekuna ni . . . ne kuna ni poto fa nako nyana yefitile kuzwa—kuzwa . . . Muzwale Drummond Thom ni musala hae. Yo ki yena mahe ni ndatahe baba inzi fa busihu bo. Mi kona ba sa zo kuta fela kuzwa kwa Africa ko ne ba bile ni lisebelezo zetuna za puluso ya moyo ni lisebelezo za foliso ya Bumulimu. Kalibe nyana yo ato munga, Na lumela kwa sibaka sa bo kuku a hae, zazi leliñwi, ni kuba ni sebelezo ya mwa tolongo, mi baezalibi ba taha ku Mulena, ni lika kaufela. Neli fela nto yende ka mo Mulimu na itusiseza linyalo la babanca lani. Bateni mo cwale mwa America fa nako nyana kuli baeze bulumiwa bobuñwi.

10 Haiba ufi wa mina kaufela balisana . . . Ni bata kuñolela Muzwale Drummond li . . . Drummond, Na, ehe, Na lyanganisanga libizo leo. Kiñi ha na si ka nga fela libizo lelinde la Sikuwa ni kulibala ka leo? Ha lu mufeni fela nombolo, u bulela sikamañi, kakuli ha Ni koni si ka utwa, batili. Ha ni sepi kuli licika la luna lakona kuutwa zeo. “Drummont,” Na sepa, kona mo li bizezwa; mi Kezeli Charlotte. Haiba yomuñwi wa mina ubata kuba ni bona, Ni tabela ku ba utwa ha ba kena mwa keleke ya mina.

11 Kalibe yani, yena Kezeli Charlotte, ki mwanana fela. Na sweli kufa bupaki kwani fa nako nyana yefitile, ku Meda, ka za kutwisiso yene ba nani kwa Africa, mi Ni mi bulelela kuli neli . . . Billy, ne li tisize linako za kale hape; ne li utwahala inge

kubulela mwa si Afrikaans. Mi kacwalo ndwa yakolota kwani sina mo ibezi kwanu.

¹² Haiba kuna ni ya tabela kuba ni Muzwale Drummond kwa . . . ni Kezeli Charlotte, kwa mukopano wa keleke ya bona, haiba nmwa tabela, mu bize fela Muzwale Tony Zabel kwani kwa MELrose 7-3945. Haiba mutabela ku iñola, babañwi ba mina bakutazi, Na kaniti ni lumba Muzwale . . . Kakuli ki mukutazi yomunde, kuzwelela asali fela mushimani, sani luli si tokwa makalelo, a kukala. Mi ki ya sina sabo, mushimani yomunde, mi Ni mu lata hahulu. Cwale, mu hupule, MELrose 7-3945. Mi Ni ka siya kadi nyana ye fa, kuli haiba muka . . . Yeo kona kadi ya bona, mi haiba hamukoni kuñola nombolo ya bona, kihande, mwakona kutaha ku to i nga, kamba nako kaufela mwahala kufela kwa lisebezezo ze shutana busihu boo. Ni kuba ni nombolo ya bona ni kuba lizeza haiba mutabela kuba ni bona mwahala likeleke za mina mwa mukopano, kamba mutu yo muziba ya tabela kuba ni bona, kakuli baba ni likundi mwa America kaufela.

¹³ Kana seo ha ki sesinde nji? Africa ina ni kuluma bahasanyi ba linzwi kwanu kwa America! Se kona sibaka ko ba tokwahala, ona kwanu, se si maswe hahulu kufita mo babezi kwani.

¹⁴ Kacwalo ki ba baikutwa hande ni baba tabile kuli Mulena u mi fitisize kwa omunca? Mi ki luna ba fa, lu taha kwa mafelelezo a nzila. Ni kulapela kuli Mulimu alu swalele libi za luna kaufela ni lifoso za luna.

¹⁵ Cwale, Ni bata kubulela cwana Ni si ka kalisa kale. Ni lakaleza cwana, ku mañi ni mañi wa mina, mwaha omunde hahulu mi o iketile o Ni kona ku mi lakaleza. Mulimu abe ni mina! Mi mu hule ka butu, ni ka moya, ni ka masheleñi, ni ka libyana. Lika kaufela zeo Mulimu akona kutisa ku mina, Ni lapela kuli A li eze.

¹⁶ Cwale Ni talimezi mwaha o munca, na kasibili, ki Mulimu fela ya ziba ze li kwapili. Mi buiketelo bwa luna buna ni kuezwa ona fa. Luna ni sicaba sa luna kaufela. Muzwale Jim, kwani, u itukisize cwale, ka memo ni lika zeñwi kuzwa kwa lifasi loote, lifasi loote kai ni kai; kubona moo Mulena aka lu zamaiseza. Mi Ni kupa luli litapelo za mina sicaba, ku lapela ka pilu ya mina kaufela kuli Mulimu asike a ni lumeleza ku lyanganaha. Ni—Ni . . . Ka sika kaufela se Ni bata kuba sona, ki kuba ya sepahala mi isi kulyanganisa. Mi cwale, Ni bile ni mwaha omunde.

¹⁷ Linako zeñata, batu ba palelwanga ku utwisisa. Mi ha ba bulela kuli, “Muzwale Branham, una—una . . . ha usa yanga kwa libaka inge mo no yelanga, mi sina bakutazi babañwi ba mo ba ezeza, ni kuba ni kaufela . . .” Ni—Ni ni itutile nto iliñwi, ka kuituta tuto yezwa mwa Biblele ya luna ni kuzwa ku Mulena luna, kuli Jesu ne si muuna ya na ikumuhusa. Na—Na si ya cwalo, Na sina buitamo bwa kubonisa. Mwabona, Na—Na si mutu ya bonahalizwe, ni hanyinyani. Mi ha Ni lumeli kuli balutiwa

ba Hae ki baana baba ikuhumusa. Ne ba si ka ikeza kuba ni muikuhumuso.

¹⁸ Foo kona fo Ni nahana kuli lu latehisize mukolo kacenu, (Mwendi ki mulelo waka fela.) kuli, halu lukela kuba ni mulumo omutuna ka lika kaufela, mwa ziba libaka, Ni sepa kuli ku bonahala inge kuli ki buikuhumuso kufita kuba kuipeya ka kukena.

¹⁹ Kana mulemuhile mwa kutaha kwa Mulena, bona baba Mu amuhezi luli? Neli Simioni, hakuna ya na si utwile sika ka yena, kono nasweli kubata Mulena. Anna wa sibofu, mwa tempele. Joani Mukolobezi, mwa lihalaupa. Mi bani . . .

²⁰ Joani naile mwa lihalaupa ana ni myaha ye naini ya kupepwa, na si ka bonahala hape konji ka myaha ye mashumi amalalu; mwa lihalaupa. Mi batu sina bani bene ba lumela ka kuipata pata, ni kuzwelapili kuikokobeza, ne ba libelela kutaha kwa Mulena. Mi ne ba si ka patalaza mikopano ya bona ni ku ibeya fa lisupo zetuna (“Ki hola! Ki nako!”) ni—ni li lipapazo ni lika kaufela. Zeo li lukile ku baba tabela kueza ka nzila yeo, kono, ku na, seo ha si bonahali sina bu-Kreste.

²¹ Na ziba nako yeñwi mizwale ba Hae ne ba Mu bulelezi, kuli, “U eza limakazo ze ni lika zeñwi, kiñi ha U sa yi kwa—kwa Jerusalema? Mi lu ya kwa mukiti wa Paseka, lu yo biza Kefasi muprisita yomuhulu, ni bani kaufela, ni kuba zibisa. Eza cwalo fapila bona sina cwalo, kuli bakonde kubona misebezi ya Hao yemituna. Mi cwale, mwabona, ki sikamañi So sweli ku icanganisa ni sikwata sa bayambi, ni zeñwi cwalo, kwani kwa nuka, ni sikwata sa batu sani bab shebile bani? Sikamañi . . . Kiñi ha U sa nanuhi ni kutaha kwanu kuli lifasi libone?” Mwabona?

²² Jesu naize, “Hola ya mina iteni kamita, haili ya Ka ha isika taha.” Uh-huh. Mwabona?

²³ Joani neli nako yeñwi . . . Joani Mukolobezi, ma—ma Mañolo na bulezi za kutaha kwa hae. Mi ali, “Ha taha, kuli . . .” Kiñi, Isaya nalibulezi, bukaufi ni myaha ye mianda ye supile ni ye lishumi ka yemibeli asika pepwa kale, “Kuli ku kaba linzwi la ya huweleza mwa lihalaupa.” Mi ali, “Malundu kaufela a ka takisa inge lingunyana, matali kaufela na kambela mazoho, libaka ze lumbile ne li patamisizwe, mi libaka za misindi ne li ubezwi.”

²⁴ Sipolofita se si cwalo! Mu nahana cwani kuli bakutazi ba lizazi lani . . . Hane ba lemuhile Sani, ne ba ka bulela kuli, “Mawi! Mupolofita yomutuna yani ha ka taha, mañi ni mañi uka mu ziba. Mulimu uka otolola fela situwa sa lihalimu, malibela a Lihalimu aka tuluka fafasi, koloi ya mulilo ika tuluka fafasi, sikwata sa mangeloi si ka mu sindeketa fa lifasi.”

²⁵ Ha na tile, nali mukutazi wa mahaha kwa sifateho ni kaemba ka litalo la ngu inza itamile kona, ni lukanda lwa mukata wa ngu. Mwendi na sa tapangi; likweli zetalu kaufela kamba zene. Kwande kwani mwa lihalaupa, a shokomoka, ato yema mwa

sileze, se si kuma mwa mañwele, inza kutaza, “Mubake, kakuli Mubuso wa Lihalimu u fakaufi!” Na si ka ya kwa mileneñi. Haiba kuna ni yana bata ku mu utwa, na na ni kutaha kuzwa kwa Jordani ku to mu utwa, bona baba bata kueza cwalo. Ki sikamañi sa na ezize? Na nyungile naha, na nyungile lifasi.

²⁶ Kuna ni zikinyeho ye sweli kuezahala yeo sicaba hakuna ze si ziba ka yona. Mi Jesu ha taha, Na si ka iponahaza Iliyena mwahala baika ba batuna. Na tile ku ba Hae Tota, Na tile ku bene Ba Mu libelela. Kwani kona ko ne ku zwelela nyungano. Sani kona Sa eza kacenu. Moya o Kenile utaha ku bao ba bizize Mulimu. Kuna ni nyungano yetuna mwahala Baketwa. Taba, yetuna ya ezahala, kono lifasi hakuna se li ziba ka zona.

²⁷ Ba nahana kuli, ona lika zetuna ze kaufela, ni litukiso za lifasi kamukana, ni mazimumwangala, ni miyaho yefeza ma dollar amañata, ni lika kaufela, zeo kona lika zesweli kuezahala. Bwani ki bukuba kwa meto a Mulimu. Mulimu ha talimi fa lika zetuna. Seo mutu abiza “bukuba,” Mulimu usi biza “Butokwa”; ni seo mutu abiza “butokwa,” Mulimu usi biza “bukuba.” “Ne si Mu tabisize, kuli ka butanya bwa kukutaza, kuli kupiliswe ba ba lateha.”

²⁸ Cwale, Joani. Munahana kuli ba bulela sikamañi? “Kuna ni mufitelezi wa tumelo wa kale kwani, mucaha ya bonahala mahaha kwa sifateho, a zwa mwa lihalaupa inza itamile litalo la ngu mwa teka. Mi, kiñi, uyemi mwa sileze, mahutu hutu ona cwalo, kwani kwa matuko a Jordani, ni kuzwela kwande kwani. Ki mañi yakile autwa taba yecwalo?”

²⁹ Mi Jesu ha taha. “Mesia, na pepilwe mwani mwa sikungu, fa libunda la bucwani, mi—mi ni likomu neliliteni kwani? Mi—mi u talusa kuli me. . . Mwana wa mwa bucwani, sina ndatahe. . . Bomahe ne ba lukela kuba bomahe mane ba si ka nyalana kale, kiñi, Na pepilwe ki linyalo le li kenile. Mutangana yani?” Oh, mawi! Mwabona? Kono neli Nto Yetuna, ne ba sa Li zibi fela. Mwabona? Ne ba sa Li zibi.

³⁰ Mi kona mo iinezi ni Evangeli kacenu “Yetuna.” Mi Evangeli ya nyunga sina mo I samba kuba inyanganye cwalo fateni, kono Isweli ku nyunga bo masiyaleti. Yeo ki niti, ku ba baakanya.

³¹ “U tile ku ba Hae Tota, ba Hae Tota ne ba si ka Mu amuhela.” Na bulelezi balutiwa ba Hae kuli, “Musike mwa ya ka nzila ya Bamacaba, kono muye kwa lingu ze latehile za Isilaele. Mi, hamunze muya cwalo, ya ka mi amuhela u amuhezi Na. Ha mukena mwa munzi, habasami amuheli, mututule maluli kwa mautu a mina ni kuya kusili. Mi kaniti Ni li ku mina, ku kaba sishemo kwa Sodoma ni Gomora mwa lizazi la Katulo kufita mo ku kabelo kwa munzi wani.” Mi ufi ni ufi wa minzi yani yene hanile baana bani i inzi mwa mufuse kacenu. Kaufela ya na ba amuhezi, u sa yemi nonga sina mutu muyaho omutelele. Yeo ki niti, mwabona. Singa nako yetelele fa ku alaba; kono Mulimu wa

alabanga, musike mwa bilaela. Ha ni si ka kalisa ka yona yeo, Hanina kukena mwa Sinulo. Oh!

Oh, Ni bata ku Mu bona, ni Mu talime kwa
sifateho,
Teñi ni opele kamita za sishemo sa Hae se si
pulusa;
Mwa mikwakwa ya Kanya ni tumuse kwa
linzwi;
Foo manyando kaufela ha sa felile, niyoba kwa
lapa, ku yo nyakalala kamita.

³² Na lata cwalo. Halu inamiseni litoho za luna fa nako nyana. Kana muabela kuyema musika eza kale cwalo? Na—Na sepa. . . Bibeles iize, “Ha mu yemi, mulapela, muswalele.” Ki ba bakai babana ni kupo ye mubata fela ku zibahaza ka lizoho le li nanuhile? Muhupule, Mulimu wa bona, Wa ziba ka zona kaufela.

³³ Ndata luna yakwa Lihalimu, lu atumela Kukena kwa Hao kwa Bumulimu ka Libizo la Mulena Jesu, lona Libizo le li mata kaufela le li filwe kwa batu lani, kuli neba mabasi mwa Lihalimu ni mwa lifasi kaufela a biziwa ka “Jesu.”

³⁴ Mi lwa lapela, Mulena, kuli U amuhele buitumelo bwa luna. Pili, ka kukala, mwaha o shwa wo. . . halunze lu ufeza busihu bo mwa sebelezo, lu u feza ka kufa milumbeko, kubala Linzwi la Hao ni kuziba kuli SA BULELA MULENA KISONA ku talusañi. Ki lika zekai ze ne lu ka ñola fa pampili kuli lu itumele kazona! Linzila zenyinyani, ze sisani ze lu bandukile ka zona mwaha wo, foo Satani ha na ka hamula bupilo bwa luna mwateni, kono ha U si ka feza kale ni luna. Kona kuli lu sa zwelapili. Lwa lumela, Mulena, kuli lu pepilwe fela ni kuhulela mwa lifasi le ku to kuteka ni ku Ku lumba.

³⁵ Mi lwa lapela, Ndate, U lu swalele ka bumaswe kaufela ni mafosisa kaufela e lu ezize mwahala musipili. Halu libaleñi mafosisa a luna busihu bwa kacenu halunze lu ipulela, ku a pumbeka mwa Liwate la Kulibala, ka Libizo la Mulena Jesu, lu si ke lwa a kata hape; kono cwale lu kufita fa sikonkwani se, ku Muuna ya petehile yani, Krete Jesu. Lumeleza cwalo busihu boo, Ndate.

³⁶ Batanga ba Hao habanze ba bulela, mañi ni mañi wa bona, U ba toze ka Moya wa Bupilo, mi ha ba kutaze kushutana ni sapili, ni kutisa mañusa mwa keleke busihu bwa kacenu.

³⁷ Mi lu kopani mo mwatasa situwa se, seo luitumela ka sona, Mulena. Lu itumela ka kuba ni mulilo o futumala wa kuina kwatuko, kakuli situwa si kwahezi toho za luna, zeo kaufela ki ze butokwa.

³⁸ Kakuli sifumu sa luna ha si yo mwa lifasi le, si mwa lifasi le li sa taha. Mulimu, lu bulukela kwa halimu kwani ko lu lumela kuli masholi habakoni kupunya ni ku uzwa, ko mafume asakoni kusinya, kakuli sifumu sa luna ki Bupilo Bobusafeli. Mi lwa

lapela, Ndate, kuli U lu lumeleze ku tabela zeo ka mazazi kaufela a bupilo bwa luna.

³⁹ Lu eze batanga babswanela. Zwisa bumaswe kaufela ku luna, Mulena, kaufela za kale. U li beye. . . Mi mibisi kaufela ya pilu seta ni bumaswe kaufela bu takulwe mwa bupilo bwa luna, kuli lukone kuba baba ikokobelize ni baba munati fapila Hao. Lumeleza cwalo, Mulena. Halubeni ni mwaha o mutuna hahulu ku o lukile lwaba ni ona haisali, mwaha otaha wo. Lumeleza cwalo. Lufe cwale, busihu boo, kwa Linzwi la Hao halunze lu libelela kwa mañusa a Hao. Ka Libizo la Jesu lwa lapela. Amen. Mwakona kuina.

⁴⁰ Cwale, kutata hahulu kuli ni bone waci yani fani, mi ha Ni lati kubeya mizwale yaka inge ilibelezi, kacwalo Ni ka lika kuakufa kapili mo ku konahalela ni kufeza siemba se hande. Mi, mwendi, haiba ha lu fezi, konakuli kamuso kakusasana luka lika mwendi ku zwelapili, haiba Mulena alata. Mi cwale haiba Muzwale Neville ha sa tahi, kamba sika kaufela, kihande, konakuli Ni ka lika, haiba Mulena alata, kuba mo ku to zwelapili kwa sebelezo ya sikolo sa la Sunda.

⁴¹ Cwale, musike mwa libala cwale:

Mulapele, mulapele, nzila inosi fela
 . . . fita fa mayemo a pahami;
 Mulapele, mulapele, tapelo ya tumelo
 Ika tisa limbuyoti za Mulimu.

⁴² Yeo kona nzila fela ye mukona kueza ka yona. Ha lu iopeleñi hamoho. Mwaha Omunca wo cwale, luna ni nako yeñata.

Halu lapeleni, mulapele, nzila fela inosi
 Kufita fa mubu o pahami;
 Mulapele, mulapele, tapelo ya tumelo
 Ika tisa limbuyoti za Mulimu.

⁴³ Kacwalo haiba tapelo ya tumelo itisa limbuyoti za Mulimu fafasi, ha lu zweleñi pili kulapela kanti. Ki tabo luli, busihu boo, luna ni lifateho zenca mwa Mubuso wa Mulimu ze ne si yo mwaha o felile. Mi Na, ni zwelapili fela kulapelela zeo hape kuli ba bañata ba ekezwe ka nako kaufela. Mi licika ha li si ka bulelwa kale ka ze kaba kwa neku leliñwi.

⁴⁴ Cwale, lu ka apula mwa kauhanyo ya 4 ya Sinulo. Kana kuna ni ya tokwa Bible? Luna ni Libibele zeñwi kwanu haiba mutabela ku lu latelela. Ku lukile, alimuñwi wa balibeleli ba fa munyako atahe cwale, luna ni fela sishañata sa Libibele kwanu. Alimuñwi wa basepahali, balibeleli ba fa munyako, kamba nto yeñwi, mutahe kwanu ona fa. Muzwale Zable; yomuñwi atahe, niyena. Haiba mubata kunga fela liemba zepeli, mi luka shetumuka mwahala lipula. Mi mutu kaufela ya bata Bible, kuli a latelele ni luna, kiñi, amu lishimbe fela ona cwalo mi mu fe ku mutu kaufela ya bata.

Mi lubata kuli muapule cwale mwa Sinulo, kauhanyo ya 4.

⁴⁵ Mi, cwale, haiba muinzi kwa mulaho mi mubata kutaha kwapili kwanu, luna ni fela sibaka sesituna busihu bwa kacenu kuli mu tahe. Mi muikutwe fela kulukuluha, mi mukene fela mwa tuto ni ku ni tusa ku ipalela zona, ni ku ituta zona halunze lutaha hamoho. Kuna ni lipula kulo fa. Ni bona bababeli ba ba taha. Mi kuna ni lipula zepeli kwanu. Ki se fa silisiñwi sa zona mwahali mo. Ni kwa mulaho kwanu, kuna ni lipula fela kwanu. Ni sepa kuli kufuka kwa moya kwa fita kai ni kai.

⁴⁶ Mi cwale, ki babakai bene ba ikozi tuto ya luna yene lunani, tuto ya mazazi a eiti ka *Masika a Likeleke Zesupa*? Ni itumezi. Si ni utwisa hande, kakuli Nina ni mbuyoti yetuna hahulu ku zona na kasibili.

⁴⁷ Cwale, busihu boo ka kauhanyo ya 4, lwa funduka cwale, Joani na ambozi kwa Lusika lwa Keleke ya Laodesia. Mi, mwa Lusika lwa Keleke ya Laodesia loo, neli lusika lwa keleke ya masila hahulu mwahala zona kaufela.

⁴⁸ Mi lu fumani nto yemaswe hahulu mwa kalulo ya mafelelezo ya Lusika lwa Keleke ya Laodesia, Jesu na yemi kwande a keleke ya Hae Tota kwa Na lelekilwe, inza ngongota fa sikwalo, ku lika kukena mwahali. Kana seo ha ki sibi nji? Ni sepa kuli ki iliñwi la Mañolo a tomola hahulu pilu e Ni kile na bala. Jesu, kwande a sikwalo sa Hae Tota, mi keleke ya Hae ne i Mu lelekile, mi U lika kukutela mwahali kuli aba pilise. “Mutu kaufela ya ka kwalula, a Ni lumeleze kukuta mwa ndu ya Ka, Ni ka ca ni yena mi yena ace ni Na.” Kana ha ki kuli . . . kana seo ha si tisi makeke? Mulimu wa Lihalimu, ku lelekelwa kwande a keleke ya Hae Tota, ka lituto za litumelo za bona ni likopano ni nzila yene ba ya ka yona. Ku ba lelekela kwande . . . ku Mu lelekela kwande a keleke, ba amuhela lituto za litumelo za bona fela.

⁴⁹ Ki nto yeswana fela sina mo ne kuinezi ka lizazi la kokotelwa Jesu. Mi fani neli ha ba amuhela Barabasi, sibulai, ni ku kokotela Jesu. Neba tamuluzi sibulai mwahala bona, se ne si pakilwe kuli ki “sibulai,” ni kuamuhela . . . ni kuhana Jesu Krete, yena fela Anosi yana kona kufa Bupilo.

⁵⁰ Mi yeo kona nto yeswana yeo kopano kaufela, ni kopano ya Pentekota, ina ni kacenu. Ba bona kuli likopano zani li shwa kapili fela mo li sa ikongakonga fela. Ha ku si kaba kale ni iliñwi (mwa—mwa makepe a litaba za kale) ze kile za ikopanya mi zelikile za eza sika kaufela kwanda kushwa fela kapili. Lisupo kaufela, ze komokisa, ni limpo ne li ba siile, ni lika zeñwi kaufela, ba ma no kopana fela. Mi kufita kuli ba amuhele Mulena Jesu kuli abafe Bupilo, ba kutela hape ku yo tamulula Barabasi mwahala bona hape. Kana seo ha si tomoli pilu nji? Ki kabakaleo Mulimu na lelekezwi kwande a keleke ya Hae, mi inza yemi, inza ngongota, fa lusika lwa keleke ya mafelelezo, kulika ku kutela mwahali.

51 Cwale, lu fumana kuli Sinulo i kwahezwi mwa liemba zetaalu. Sa pili ki likauhanyo zetalu za makalelo, ze lukela kuba kwa Keleke, ki Liñusa, ki lingeloi. . . kwa mangeloi a Keleke. Mi kuzwa. . . Mi kipeto Ya lateha mwa kauhanyo ya 3, ha i sa bonahala hape konji mwa kauhanyo ya 19, mwa kauhanyo ya 19 Ya kuta. Mwahala nako ye, Mulimu utalimana ni Majuda. Mi, kuzwa fani kuya kwapili, ki mwahala kutaha kwa munzi omutuna wa Jerusalem, mi ni—ni kuswaiwa kwa sicaba sa Isilaele, ni zeñwi cwalo, kwa nako ya maungulo.

52 Cwale, kacwalo busihu boo lu siya. . . Kapili kasamulaho wa se, Joani naboni. . . Fa sooli sa Patmosi. . . Ki babakai baba hupula butelele bwa Patmosi kuzwa kwa. . . neku la likamba? Neli buhule bo bu kuma kai? Mwendu ka limaili ze mashumi amalalu, yeo ki niti, kuzwa kwa likamba leliñwi. Mi neli buhule bo bu cwani kupotoloha Patmosi? Mwa hupula libaka zeñwi za sibaka? Mwendu limaili ze lishumi ka zeketalizoho bukaufi ni sona. Mi ne si itusiswa ku bene ba baleha kwa Maroma, neba nepela fateni bapantini. Mi Joani nali kwani ka sikamañi? Ki sikamañi sa na ezize? Kikuli na—kikuli na uzwile sika? Batili. Kana na. . . Ne ba mu kashelize kwande kwani kakuli nasweli ku lyanganisa sicaba mi. . . kamba kueza nto yemaswe? Batili. Nabezi sikamañi kwande kwani? Bakeñisa Linzwi la Mulimu ni bupaki bwa hae, ka kukutaza Evangeli.

53 Mi kana sika sa kona kuezahala ku Mukreste isi ka bunde? Batili, batili, batili. Kona kuli ki sikamañi sa na muiselize Mulimu fani fa sooli anosi? Kulia lufe Buka ya Sinulo. Mwabona, Mulimu ukona fela kuhoha boya fa meeto a diabulosi ka nako kaufela Ya lata. Nji Cwani? Yena wakona fela. Na Mu lata fela. Kakuli, Hani lukeli kuba ya butali, mwabona. Cwale, kambe Ne ni li ya butali, Ne ni ka lika kulibala kaufela ka zona kakuli Hakuna yeni ziba yakona kuba ya butali sina Yena. Mi kacwalo Na—Na fela. . . Kaufela se Ni nani, Na itoboha ku Yena ni kueza fela Za bulela kuli eza. Ku felile. Fokuñwi ki nto ye shutana luli ni mo Ni nahanela. Kono Na ziba, haiba U sweli wa i zamaisa, U butali. Wa ziba Sa sweli kueza, Na ha ni zibi. Kacwalo Na Mu lumeleza fela kueza cwalo, mwa bona, konakuli fela ki. . . ku lukile. Mwabona? Kacwalo Ni Mu tuhelezi fela kueza cwalo. Kona cwalo, Muzwale Neville. Eeni, sha, mutuhele fela Yena aeze cwalo. Mwabona? Ki Yena ya ziba Za sweli kueza, Na ha ni zibi. Mwabona? Kacwalo Ha ni liki fela kuba ni mapalisa amatuna ni lika zeñwi. Mi ka kuikokobeza fela ili na, ni bulela kuli, “Ki Na yo, Ndate, nako kaufela Yo bata.” Kacwalo muzwelepili fela ona cwalo mi kamita zataha hande.

54 Kacwalo, Joani, ne lu sike kuba ni—ni Buka ya Sinulo kambe ne si Joani, mi kambe Joani na si ka zwela fa sooli. Yani neli nzila ya Mulimu ya ku lufa Buka ya Sinulo. Na li kwande kwani, Na sepa, mwendi ka myaha yemilalu, ni mwa Buka. . . a ñola Buka ya Sinulo.

55 Cwale, mi ha lu mu siya kwa mafelelezo a memo, ya timana ya 22 ya mwa kauhanyo ya 3, “Ya na ni lizebe, a utwe seo Moya u si bulelela likeleke.”

56 Cwale, lukalele kauhanyo ya 4:

Hakufelile zeo Na talima, mi, nabona, sikwalo sa kwaluha mwa lihalimu: mi linzwi la pili lene Ni utwile neli la . . . tolombita yene ambola ni na; lene lili, Taha kwanu, mi Ni ka ku bonisa lika ze lukela kubatani cwanonuñu kasamulaho.

57 Lu ka I nga timana ka timana. Mi Ni na ni Mañolo amañata añozwi fa, ki buka ya ona, mi ha Ni zibi kuli luka fita cwani ku Ona. Mi Mulena alu etelele. Cwale, mutalime, Linzwi ki kuli:

Hakufelile zeo (kasamulaho wa lusika lwa Keleke) . . .

58 Mi ze kaufela kuzwa fa kasamulaho, cwale, li ka ezahala, li ka nga sibaka fa lifasi kasamulaho wa Kuungelwa kwa Keleke. Mwabona, kasamulaho wa Kuungelwa. Se si kutela cwale ku yo nga Isilaele. Kasamulaho wa lusika lwa Keleke, kasamulaho wa masika a Keleke, mi bona . . . Keleke ha i bonahali hape konji Sinulo kauhanyo ya 19 ha Se i yokuta ni Munyali wa Yona. Mulumbe Mulimu kwa Sinawenga!

59 Ha lu baleñi fela seo. Kikuli mutabela kubala Mañolo aa halunze lu fita ku ona? Ku lukile. Ha lu apuleni mwa Sinulo 19. Ku lukile, sha, Sinulo 19. Ha lu kaleleni fa timana ya 7, Sinulo 19. Fa kona fo Keleke ha i bonahala hape, ha i sa bonahali konji mwa kauhanyo ya 19.

A lu tabe lu nyakalale, mi lu mufe milumbeko: kakuli nako itile ya linyalo la Ngunyana, mi musala hae u i tukisize.

60 Oh, Ne—Ne ni ka kutaza ka zona kufitela mwahala busihu mane ni tokwe nahaiba kuswala licika lateni. Mutalime, “Musala hae U itukisize kale.”

61 Charlie, Nellie, ni mina kaufela, ona cwalo fela zene lu bulela, ona kwani, ni Rodney, zazi leliñwi. Mwabona? Fani Elisha ha to nepela sapalo sani ku Elia . . . Kamba Elia a si beya ku Elisha; a yo inama ni ku linanula hape, a ipeya lona ni kuzamaya ni lona kufitela a sila Jordani, mi a pahama lilundu ni kupahama mwa koloi, a li wiseza fafasi.

62 Mi Mukreste ha piliswa pili, sifateho sa hae si talima ku Kreste, konakuli una ni sesiñwi sa kueba yena muñi. Una ni kuba cwalo, taba yetatama, aikenise kwa mikwa ye masila kaufela, “u beya kwatuko buima kaufela, u Itukisize. Munyaliwa sa Itukisize kale!”

63 Si ni hupulisa likande nyana, Ni lukela fela ku lil bulela lu si ka zwelapili kale. Kuzwa kwa Wiko kwanu, nako yeñwi yefitile, myaha yemiñata ñata, neku na ni kampani yebizwa Armour ni Swift Packing Company. Mo ba ezezanga, ba zwela

kwande kwani ku to leka likomu ni kuleka mafulisezo. Mi lifeza mashelañi amañata, ni kuleka libaka zenyinyani kaufela za milaka, ni kuba ni ma milioni a sibaka sa mafulisezo sina cwalo, basebeliza zona zeo, ili likomu zende za Hereford mwa likalulo kalulo. Bona luli. . . Linjanji za bona ni lika zetisanga likomu zani kuzwa kwa mafulo amañwi kuya ko kuñwi.

64 Mi Armour ni Swift nebana ni sibaka sesituna sa mafulisezo, mi zazi leliñwi neba na ni temuho kwani, muina sipula, neli, wa muña a likomu, nana ni bana babane kamba ba ketalizoho ba basizana. Mi ba fumana kuli alimuñwi wa mizwale ba ha Armour nali. . . kamba, isiñi mizwale, kono bana, neba ka yo potela fa likamba. Mi yena nali—nali fela mwanana, ya si ka nyalwa. Mi basizana ba kaufela ne ba ziba kuli ne ba ka ikungela yona aszo—asazo punya fela. Mi kacwalo kaufela bona neba itukisa mi ba lukisa lika kaufela.

65 Ha na ilo fita kwani, neba ka mu katanyeza ni kuapala litino zende ka zazi lani, ni lindelesi za bona, ni mulamu wa bona ku yona, ni likunupo za .44 fa noka kaufela, mi ni likuwani zani li inzi kwa mulaho wa litho za bona, mwa ziba. Mi ne ba kaba sina ba kwa kwa wiko, mi mañi ni mañi wa basizana na ka ba ni. . . Alimuñwi wa bona na ka ikungela mushimani yo.

66 Mi nebana ni—ni mwana musizana yomunyinyani kwani yana shwezwi ki mahe mi ndatahe. Nali mwana bo maluma bona, mane nali mutanga wa bona kaufela bona kwani. Mi musebezi wa masila kaufela, nana ni ku u eza, kutapisa mikeke ni lika kaufela. Mi na sina litino, na natinanga liapalo za kumutubulela zetuna mi. . .

67 Kacwalo nako hane isutelela kuli mushimani yani a tahe, kaufela bona batina kena mwa sikocikala sa bona mi, ki bao, baya kwa sitishini ku yo mu amuhela. Mi ne ba kunupa litobolo, ni limbongolo inge li kibakiba, ni lika kaufela. Mane ba mu tisa kwa milaka. Mi busihu bwani kwa ba ni mukiti wa kubina. Mi ba zwela kwande kwani fa mabala ni mulaka mabunda a mataka, mi ba—ba opela ni kubina, mane mwahala busihu kaufela. Na li kwani ka mazazi amabeli kamba amalalu.

68 Yena mwana musizana yomunyinyani yo. . . Cwale, Ni ka swanisisa se ku sesiñwi cwale. Bana bahesu baba tinile hande, mata amatuna ni likeleke zende, mi ku bonahala kuli haiba kuna ni libizo la masila lina ni kufiwa kwa mapentekota, ki sika se si fosahalile. Ba ezanga ze fosahalile ni bona, kono hakuna ze utwaha ka wena, mwa bona. Se bali baba bunangu, kacwalo bona. . . ha mu utwi ka zeo. Kono mutuhele kuli mukutazi yomuñwi wa Pentekota aeze mafosisa nako yeñwi, mi, muzwale, Na mi bulelela, ba ka mu shubaula mwaha naha kaufela mwa pampili ya mutende. Eeni, sha. Mutuhele kuli muzwale yomuñwi wa pentekota alapelele mwana, mi a shwe, pampili kaufela

mwa naha ika si patalaza, “Foliso ya Bumulumu Ki Tumelo ye fitelezi.”

⁶⁹ Kihande, cwale kiñi ha ba si ke kuñola taba kaufela mwa mutende ya palezwi dokota? “Ze swanela licikwi, za swanela ni pato.” Mwabona? Kacwalo, kambe ne ba ka eza cwalo, ne ba sike kuba ni sibaka sesituna mwa mapampili a muntende kuli bañole bafu kaufela. Hane Ni ka zwela kwa mabita ni kubulela kuli, “Kaufela yashwile ka mwata a foliso ya Bumulumu zuha,” ni kubulela kuli, “Mañi ni mañi yakile a shwa inza alafiwa zuha,” ne ba ka fitelela kueza buñata bolule ka alimuñwi. Mi yeo luli ki niti. Kona kuli haiba ba ka lwanisa iliñwi, ba lwanise ni yeñwi. Kona kuli yeo ki niti. Kono ba bulaya bo lule mwa silimo ni milyani, mi hamuna kuutwa linzwi ka zona. Mwa bona?

⁷⁰ Kacwalo, musizana yomunyinyani yo, nana ni musebezi o bbukiti kaufela wa kueza. Kacwalo he, ona fani fela, mushimani. . . busihu bobuñwi mulalelo umano fela mi neba na ni kubina, mi ufi ni ufi wa basizana bani a ipaakanya, yemi hande, mwa ziba. Mi musizana yomunyinyani yo na apezi ndelesi yenyinyani, ya kale, ye pazauhile. Mi busihu bobuñwi na inzi mwa muyaho wa busafa kasumulaho wa mulalelo ufela, mi na sa tapisize mikeke ni kuzwela fande kwa manda mino ku yo sulula sikotolo sa mezi. Musizana. . . ha na talimile kwa matuko a mulaka, ki yani na yemi fani, inza yendamezi fa limota la mulaka. Ki hali, “Lumela.”

⁷¹ Na ikutwa kuswaba hahulu, kakuli yani neli mushimani wa muina sipula, mwana muña sibaka. A kutisa sikotolo sa hae mwatasi, kuli a si ke a bona kupazauha maswe kwa hae; akala kukuta mwa mulaho, ainzi fela mahutu hutu, atalima kwa mulaho, sina *cwana*.

⁷² Mi sa ya ku yena, ali, “Usike wa ni saba.” Ali, “Ni bata ku kubulelela nto yeñwi.” Ki hali, “Ni tile kwanu ka mulelo ulimuñwi, Ni tile ku to bata musali.” Mi ali, “Ni bata batile kai ni kai.” Ali, “Ne ni sa lati kunyala musizana kwanu mo mwa tolopo, Ni bata kunga ya swanela kuba musali wa luli.” Mi ali, “Bo Ni boni kaufela, Ni bile ni ku talimela mwa sibaka se. Mi Ni fumani ka mazoho amañwi kuli u mwana bo maluma.”

Ali, “Yeo ki niti, sha.”

⁷³ Ali, “Ni bata ku kubuza nto yeñwi. Kana uka lumela kunyalwa kina?” Kiñi, na sa zibi sa kueza. Na i katazehile hahulu, na sa—na sa zibi mwa ku alabela muuna yani.

⁷⁴ Oh, Ni nahana fela mwa na utwezi. Mina boo? Kanti na, mueza libi nako yeñwi, yasina bunde ni bo bukana, mwana wa cakolwa, Jesu Krete naize, “Ni bata kuli ube wa Ka.” Kana Na ka taha cwani ku mutu ya swana sina na? Kana Na ka bulela cwani kuli, “Ni ka kufa ndu mwa Lihalimu”? Kana Na ka bulela cwani kuli, “Ni ka kupilisa”? Muikunyandela ya cwalo, zeo likona kuba cwani? Kono Na ezize cwalo!

75 Musali ali, “Muñaka, Ha—Ha ni—Ha—ni swaneli. Ha ni koni kuba mufumahali ku muuna sina wena,” ali, “kakuli u twaezi lika zetuna. Mi hakuna se Ni ziba ka zona, Ni shebile.”

Ki hali, “Kono wena u keto yaka.”

76 Mi kana ne si nto yende fani Jesu ha na mi bulelezi cwalo. . . ? Mu ziba kuli ne mu sa lukeli kuba Mukreste. Mina, nekusina se ne mu ka eza, kono Yena. . . Ha ki sika. . . Na—Na mi ketile fela. Mwabona? Yena. . . Ki bunde bwa Hae, ki sishemo sa Hae sa Na mi ketile. Ne mu si ka Mu keta, mwa ziba, Na mi ketile. Ye o ki niti.

Ki hali, “Ha—Ha ni. . .” Ki hali. . .

77 “Usike wa talima fa litino za hao. Ha ni talimi fa litino za hao, Ni talima ku seo uli sona.” Ki hali, “Kana walumela kunyalwa kuna?” Mi mafelelezo tumelano ya ezwa. Mi ki hali, “Mwaha ulimuñwi kuzwa lizazi le, Ni ka kuta. U itukise. Ube ni sapalo sa sinawenga, kakuli Ni ka kuta ni to kunyala ona mwa patelo yee. Mi Ni ka kuisa kwa Chicago, kwa Outer Driver, kwani ko u ka yo pila mwa ndu ya situwa yende yetuna. Mi ni za kutapisa mikeke ze kaufela li ka fela, ni lika, zeñwi.”

78 Mi basizana, kamba likezeli za bo malumahe, ha ba utwa cwaloa, se bali, “Wena mubotana, sikuba, tuwe! Kiñi, uziba kuli muuna yani na sa talusi cwalo!”

79 Mi kana zeo ha ki zona fela ze ba bulela kacenu? “Kana sikwata sa sapikuluhi baba kenile ne si ka kona cwani, sikwata sa batu babasa koni niheba kuñola mabizo a bona, kana bakona kuba cwani Keleke? Kana sikwata se si cwalo sikona kuba cwani?” Kono zeo fela li lukile. Ha lu beelezwa ni ku utwa ku tubeta kwa Jesu Kreste mwa lipilu za luna kuli ku takule sibi sa luna, Sesiñwi si lu bulelela kuli Wa kuta hape, ka ku sephala fela sina lifasi molibezi teñi. Zazi leliñwi Uka kuta.

80 Mwaha kaufela na beleka, inza leka libyana, kubuluka ona ma senti a sebente-faifi ani, sene—sene ba mu holisanga kwani zaona lituwelo za hae ka zazi. Mi nasweli kubuluka maseheleñi a hae kuli aitekele sapalo sa hae sa sinawenga, ni kulukisa lika kaufela. Oh, zani neli fela mihupulo ya hae, ya ku itukisa. (Mi ubile. . . “U itukisize Iliyena.”) Alukisa liapalo za hae, liapalo za hae za sinawenga, likezeli za hae inge ba mu seha ni ku mu bona bukuba.

81 Mafelelezo la taha kwa. . . mafelelezo zazi la fita. A apala mwa sapalo sa hae sa sinawenga (Oh!), aitukisize kaufela mi atapa. Mi likalibe zeñwi za taha ku yena za li, “Kihande, wena nto yenyinyani fela. Kiñi, u ziba kuli na sa talusi cwalo. Na sa buleli ni. . . kunyala musizana ya swana ni wena.” Kono, yena na itukisize, nihakuli cwalo.

82 Kacwalo manzibwana afita, mi bakala ku mu soma ni ku mu bona bukuba. Na yemi fa munyako, inza libelela, nihakuli cwalo.

Mi kacwalo musali. . . yani hali, “Ki nako mañi ya na bulezi kuli ukaba fa?”

⁸³ Ali, “Na si ka bulela.” Kono ali, “Na bulezi. . . na ni bulelezi busihu bwa ka ni nyala. . . kamba ku to nifa lisale la sinawenga. Ki hali, na ni bulelezi kuli, ‘Ikaba mwaha ulimuñwi kuzwa cwale.’ Kabakaleo Ni na ni hola ye siyezi kihona.” Amen, ni libelezi fela. “Nina ni hola iliñwi ye siyezi, mizuzu ye mashumi amalalu ye siyezi, mizuzu ye lishumi ye siyezi.” Mi ba seha ni ku mu bona bukuba, ni ku mu biza mabizo kaufela.

⁸⁴ Kono, mafelelezo, ka yona hola yetata yani, ba utwa mushabati ha uhasaka kwa mawili, lipizi za taha. Ha ki taba ni yeo kubona munyaliwa yomunyinyani yani yana itukisize, a tula mwa munyako, mi mwa patelo ki yo a zwa fa palisa yetuna ya fande kiyale, mi afufela mwa mazoho a muuna ya na lata, ni kuba muuna hae, amu nanula mawa mazoho cwalo, mi ba nyalana ona foo ni kukuta ba funduka.

⁸⁵ Leliñwi la mazazi aa, muzwale, bani babasweli kuseha ni kubulela kuli “mupikuluhi ya kenile,” ni—ni “pentekota,” ni lika ze cwalo. . . Lu libelezi, lu sa na ni nako nyana. Ba li, “Ah, hakuna shutano ku zekile zaba teni.” Musike mwa bilaela, luna ni nako nyana ye siyezi. Mi ka nako yani ya Na sepisize, Ukaba teni fa. Mi leliñwi la mazazi aa lu ka fufa ni kuya kuikela. Lu itukise fela! Lu buluke hande Sapalo sa Sinawenga lutine! U zwise bumaswe kaufela mwa pilu ya hao. Kaufela zeo. . .

⁸⁶ Muteeleze Liñolo le mo li balela fa:

A lu tabe lu nyakalale, mi lu mufe milumbeko: kakuli linyalo la Ngunyana litile, mi musala hae sa itukisize kale. (Mwa utwa kana?)

Mi munyaliwa afiwa kuapala za line, yende ye kenile: kakuli line yende yeo ki kuluka kwa balumeli. (Ku lumbwe Mulimu!)

Mi ki hali ku na, Ñola, Bafuyozwi baba bizizwe kwa mulalelo wa Ngunyana. Mi ki hali ku na, Ze ki manzwi a niti a Mulimu.

⁸⁷ Kacwalo kukaba mukopano mwa mbyumbyulu leliñwi la mazazi aa, mwa bunde bwani, bunde kamita ni mita. Uh-huh. Muine fela ka buitukiso! Muipuluke ka buitukiso! Zwisa pilu ya hao kwa minahano ye maswe kaufela. Ube ni tumelo ku Mulimu, hakuna taba kamba ku unsufezi cwani ki ki babakai babaseha ni baba shungula ni kubulela kuli, “Mu ezize mafosisa.” Muzwelepili kupila ka kukena ni kupilela Mulimu. Muzwelepili fela kuzamaya, hola i tuha i taha!

⁸⁸ Kacwalo, mwa bona, Ya bonahala hape cwale mwa Sinulo 19:

Hakufelile zeo. . . (Amano bona lusika lwa Keleke.)

Hakufelile zeo Na talima, mi, nabona, sikwalo. . .

89 Cwale, muhupule, Joani usali fa Patmosi. Mi amano bona masika a likeleke kaufela afita mwateni:

. . . Na talima, mi, nabona, sikwalo sa kwaluha mwa lihalimu: . . .

90 “Ki Sikwalo.” Sikwalo ki sikamañi? Sinulo 3:8. Mwa Sinulo, kauhanyo ya 3 ni timana ya 8, “Ni ziba misebezi ya hao. Bona, Ni beile fapila hao Sikwalo se si kwaluhile kuli hakuna mutu yakona ku si kwala, ya kona ku kwala mi hakuna mutu ya kona ku si kwalula.” Ki yena Sikwalo! Ki Sikwalo! Kreste ki yena Sikwalo. Na bulezi, ku Muñoli Joani 10 kuli, “Kina Sikwalo kwa mulaka wa lingu.”

91 Mi mwa matakanyani a mishitu, mu kafumana kuli mulisana u zamayanga mwa lingu za hae. Amano libala ni kubona kuli liteni kaufela, kona aka lobala fafasi mwa munyako. Sitongwani ha si koni kukena mwateni kusina ku mu zusa, kamba ngu ya hae haikoni kuzwela fande kusina ku mu hata. Oh, ha ki buiketo ni boo lingu mo li i kutwelanga kakuli mulisana u lobezi mwa munyako.

92 Nuwe, mwa Testamente ya Kale, na yemi mwa munyako wa areka. Oh, muteeleze; ni ka bulela nto yeñwi! Na yemi mwa munyako inza kutaza kubaka ni kuluka kwa sicaba sene si mu seha. Mi mwa munyako o swana wa na yemi ku ona, hakuna mutu yana kona kutaha mwa areka kwanda sikwalo silisiñwi sani. Nekuna ni fela sikwalo silisiñwi mwa areka.

93 Mi kuna ni fela Nzila iliñwi! Ku lukile, Muzwale. . . ? . . . Kuna ni fela Nzila iliñwi ye kena mwa Mubili wa Kreste. Kuna ni fela Sikwalo silisiñwi kwa Keleke ya Mulimu yapila, mi Jesu kona Sikwalo sani! “Kina Sikwalo! Kina Nzila, nzila yeya kwa Sikwalo. Kina Sikwalo kwa mulaka wa lingu.”

94 Na bulezi kwa lusika lwa keleke ye kuli, “Ni beile fapila hao Sikwalo se si kwaluhile.” Na bulezi cwalo kwa lusika lwa keleke ya Methodist, ba keluha ku Lona, ba kena mwa kopano. “Kono Ni beile fapila mina Sikwalo se si kwaluhile.” Cwale, ha bamano amuhela kukeniswa, Ki hali, “Ni ka beya Sikwalo se si kwaluhile,” ili ona Moya o Kenile. “Ka Moya ulimuñwi luna kaufela” (cwani?) “lu kolobelizwe mwa Mubili ulimuñwi ili yena Kreste.” Na beile liñusa lani fapila keleke ya Methodist mi ba Li fulalela kuya kusili. Ba taha kwa kukeniswa ni kuhana Moya o Kenile. Mwa hupula cwalo? Ona “Sikwalo se si kwaluhile sani.”

95 Kana mukena cwani ku Kreste? Ka Moya ulimuñwi, Moya o Kenile, ili ona Moya wa Kreste. Lu se lukeni kale, isiñi ka kuswalana mwa mazoho, isiñi ka kufafaleza, kono ka kolobezo ya Moya o Kenile iliñwi luna kaufela lu kolobelizwe mwa Mubili ulimuñwi mi lu ezizwe bo muca sanda sa Mubili wani. Kolobezo ya Moya o Kenile iliñwi mwa Munyako wani.

96 Sikwalo se ne si inzi mwa Lihalimu, Sikwalo sani, ha talima mwahalimu abona Mulena Jesu. Mutalime fela siemba sa yona. Sikwalo sani, yena Mulena Jesu.

. . . Na talima, mi, amubone, sikwalo sa kwaluha mwa lihalimu: mi linzwi la pili. . . Na utwa neli. . . linzwi la tolombita. . .

97 Cwale taba ya cinca. Joani ubile atalima Patmosi, mi cwale u talima mwahalimu. Kiñi? U bona nto yeñwi ye ezahalile mwa lifasi mo (masika a likeleke aa), kutaha cwalo ni kwa Masika a Likeleke Zesupa, mi cwale kasamulaho amano feza kubona masika a likeleke, kasamulaho wa fani, kasamulaho wa masika a likeleke afela, autwa Linzwi. Mi atalima kwa Lihalimu abona Sikwalo se si kwaluhile, mi Linzwi la pili la utwahala sina tolombita. Ku lukile, sibaka sa cincia kuzwa kwa Patmosi kuya kwa Lihalimu.

98 Linzwi neli Linzwi le li swana lene li zamaile mwa likandela ze sebene za gauda; Linzwi le li swana, Linzwi ne li si ka cinca. Kono, Linzwi, ne li Li kai ha Li utwa ka nako yapili? Ki ba bakai ba bahupula, mwa lusika lwa keleke yapili? Kwa mulaho wa hae. “Ne nili mwa Moya ka lizazi la Mulena,” Sinulo 1–1:10. Kacwalo yena. . . “Mwa Moya.” Haiba mubata kuñola zeo mwa Sinulo 1:10 ni 13, “Ne nili mwa Moya ka lizazi la Mulena, mi Na utwa mwa mulaho wa ka sina Linzwi la tolombita mi la utwahala sina mezi amañata. Cwale Na fetuha kuli nitalime, Na bona Ya yemi mwahala malambi a sebene a gauda.”

99 Cwale, kasamulaho Amano mu bonisa kunutu kaufela ya likandela ze sebene za gauda zani (asweli linaleli ze sebene, ni milili yesweu kwa toho, ni zeñwi cwalo, ni mahutu inge sipi, ni meto inge mulilo, lisupo), mi ki ha utwa Linzwi leli swana (Mutokomele.) li bulela kuzwa kwa Lihalimu. Mi atalima mwahalimu ki ha bona Sikwalo se si kwaluhile. Oh! Sikwalo se si kwaluhile kwa Lihalimu! Mukena cwani? Ka Kreste Jesu, ona Sikwalo silisiñwi sani, Nzila iliñwi, hakuna mukwa usili.

100 “Mutu kaufela ya ka kambama ka nzila isili, ki lisholi ni sisinyi.” Mi mwa nguli ya yana pahami mi nali kwa Mulalelo wa Sinawenga asina sapalo se si filwe, a fumanwa ni mulatu, mi a tamiwa ni kunepelwa kwa lififi la kwande. Ki Nzila iliñwi fela, yakutaha kwa Mulalelo wa Linyalo. Ni lumela kuli Ne ni kutalize fateni kwanu ha ki kale hahulu. Nako kaufela munyali. . . Muuna ha. . . nyala mwa matakanyani, una ni ku mema batu yena kasibili, una ni ku lukisa liapalo ili yena. Kacwalo ha yo katana muuna yo fani, yena inza inzi fa tafule ya mulalelo. . . Ki babakai baba hupula nguli yani? Luli, mina baba balile Bibe. Mi afumana muuna fa tafule ya mulalelo yasina sapalo sa sinawenga.

101 Ki sikamañi seo? Munyali uyemi fa munyako mi kaufela ba taha ka memo. “Hakuna mutu yakona kutaha ku Ndate konji

ka Na. Kaufela ba Ni file Ndate, kamba ba memilwe, ba ka taha ku Na.” Ki bao ba taha, bafa makadi abona a memo, ni munyali, kuli mutu ni mutu ba bonahale kuswana. Yeo kona nto iliñwi ka za bulapeli, bwa kale, bulapeli bwa Moya o Kenile, u ba eza kubonahala kuswana. Kamba ba fumile kamba babotanile, bazike kamba baba lukuluhile, baba nsu kamba baba sweu, baana kamba basali, kaufela bona ki nto iliñwi ku Krete Jesu. Mi munyali ayema fa munyako ni kuamuhela memo, abeya kubo fa maheta a hae, kuli bafumi ni babotana kaufela ba bonahale kuswana. Kona mo kuinezi mwa Mubuso wa Mulimu, hakuna micaha yemituna ni micaha yenyinyani; kaufela bona ki mucaha alimuñwi, kaufela ki Krete.

¹⁰² Cwale, ki sikamañi se mu nahana Munyali ha yo kuta ni kufumana muuna yana inzi fani asina Sapalo sa Linyalo? Ali, “Mulikani, ukeni cwani mwahali mo?” Mi na yemi inza kuzize, ku bonisa kuli na tile ka nzila isili kwanda Sikwalo. Na tile ka lihaul, natile fa sikwalo sa kwa mulaho. Mi A mu biza kuli mulikani, abonisa kuli nali membala wa keleke, “Mulikani, u keni cwani mwahali mo kusina sapalo?” Cwale, Jesu na bulezi cwana, yena Kasibili. Mi Abiza mulibeleli wa fa munyako, Ki hali, “Amu mutame, mahutu ni mazoho.” Mi a lelekelwa kwa lififi la kwande ko ku kana ni lililo, ku bokolola, ni ku kweca meno. Ao ki Manzwi a Krete Tota, (Kiniti.) “Na lelekezwi kwande.” Kakuli, ne ku pakilwe, kusina Sapalo sa Sinawenga, anatile ka nzila isili kwanda Sikwalo. Kambe natile ka Sikwalo, na ka amuhela Sapalo sa Sinawenga.

¹⁰³ Oh, amuteeleze ku se! Mi haiba Sapalo sa Linyalo kona kolobezo ya Moya o Kenile, lu ka yo yema cwani ka nzila isili? Haiba lusika lwa keleke yapili ne lu taha ka Sikwalo, Krete Jesu, mu kolobezwe ka Libizo la Jesu Krete, ku amuhela kolobezo ya Moya o Kenile, ku to apala Sapalo sa Linyalo, lu taha cwani ka nzila isili? Haiba mutaha ka ba Methodist, ni ba Baptist, kamba ka Mapentekota, kamba kopano ifi kaufela, mu ka tamiwa ni ku nepelwa kwa lififi la kwande. Mu lukela kutaha ka Krete Jesu, ka Nzila, ki Sikwalo, ki Niti, ki Bupilo. Amen!

¹⁰⁴ Ku lukile, Linzwi le li swana, Sinulo 21, kamba, Sinulo 1:10 ni 13. Mi Ni bata kuli mulemuhe, Linzwi la na utwile ha li bulela ku yena neli mulumo wa tolombita outwahala hande. Mwa ziba tolombita mo i lizezwa, i fa mulumo omutuna. Kana tolombita italusa sikamañi mwa Bibe? Ndwa. Nako kaufela ha mubona tolombita ilila, mwa ndwa. . . mwa nako ya Bibe, mulumo wa yona no talusa ndwa, ikona kuba sinulo kamba nto yeñwi ye na ni ku ezahala.

¹⁰⁵ Cwale, yena. . . Kasamulaho wa kufela kwa masika a likeleke, mi lika kaufela za lukiswa, na itukisize buino bwa kauhanyo ya 4 fa, masika a likeleke na ezizwe. Na sa zwile kale mwa lifasi, mwa bona. Muhupule, Linzwi lene li bulezi ku yena, kwa mulaho wa hae, mwa likandela ze sebene za gauda,

musebezi ne ufelile. Mi cwale lona Linzwi le li swana lani ne li bulela mwa Lihalimu. Neli sikamañi sani? Na sa liuluze kale sicaba sa Hae. Musebezi wa hae wa lifasi ne u felile, mi Nali mwa Kanya, inza biza Joani kuli, “Taha u upahame!” Uh-hum. Amen! Seo si ni utwisa kubata kuhuwa ka Mwaha Omunca. Oh, mawi! Ki fo he cwale. Mwabona, ku lukile, “Taha kwanu!”

¹⁰⁶ Ndwa! Se kona sibaka sa ndwa yetuna; batu bene ba hanile Liñusa la Mulimu, kuhana Moya o Kenile, yena Mulumiwa wa likeleke ze sebene. Yena ya na hanile Liñusa le la muhau wa Hae ne kusina sene si siyezi, kwanda katulo ye ne libelela, kaufela ha Na itukisa ku sululela likoto fa lifasi cwale. “Taha kwanu mi Ni ka ku bonisa se si ka ezahala. Baba hanile Kreste, baezalibi babasina Mulimu, Ni ka sululela buhali bwa Ka fahalimwa bona.”

¹⁰⁷ Mutalime buino bwatani. Oh, halunze lu ya mwa masihu mu ka ba ni zeñata za zona ka nako kaufela. Ha lukoni kuba ni lika kaufela mwahali mo, lu swanela kubulela ka kutamahanya ku yona mwa sibaka se kuya kwa sibaka sani. Kuli ikaba cwani nto ye sabisa ku bao tolombita ya mafelelezo haika lila, mi cwale ndwa lu mafelelezo ha se ifelile, foo kutazo ya mafelelezo ha se i kotalizwe, fo pina ya mafelelezo haika opelwa, mi lu yema fa Sipula sa Katulo sa Kreste. U ka yo buziwa kuli, “Kiñi ha no si ka I amuhela? U ezize sikamañi ka Bupilo bo ne Ni ku file?” U ka kupiwa kufa libaka. Kukaba cwani?

¹⁰⁸ Mu ni utwile ha ni opela pina yeo, kamba kulika cwalo:

Kukaba cwani? Kukaba cwani?
Fo Buka yetuna haita apulwa, kukaba cwani?
Cwale bona ba ba hana Liñusa
Ba ka buziwa kuli bafe libaka, kukaba cwani?

¹⁰⁹ Uka yo yema fani, ka niti fela sina Buka ye ha iñozwi. U ka ba . . . u ka yema kwani ni kubuziwa libaka. Oh, za lu susueza, muzwale waka, kezeli, kwa lu lukela, sina bana ba bashimani ni basizana ba Mulimu, kuli lu i tatube ili luna hola kaufela ya lizazi. Paulusi naize, “Ni shwa zazi ni zazi. Kono Na pila, isiñi Na, kono Kreste upila ku na.” Mwabona? Mu itebuhele, kakuli ha mu zibi nako ye mu ka bizezwa ku yo ikalabela kwa Lihalimu.

¹¹⁰ Cwale, “Autwa Linzwi la tolombita.” Ku lukile. Mulemuhe, mulemuhe sa na bulezi Joani mo, na bulezi mo, mwa kalulo ya mafelelezo ya kauhanyo ya 1:

. . . linzwi la pili . . . neli . . . sina tolombita yene ambola
ni na; mi lali, Taha kwanu, . . .

Taha kwanu! Ni ku bonisize masika a likeleke fa lifasi; cwale taha kwanu, Ni ka mi bonisa nto yeñwi ye ezahala kwanu.

¹¹¹ Mwabona, Kreste na sa zwile kale mwa lifasi ka nako yani, Na ile mwa Kanya, Lusika lwa Keleke ne lufelile, kubonisa kuli Moya wa Hae no felile fa. Mi Na ile mwa Kanya mi nasweli

kubiza Joani kuli atahe, mi A mu bonisa sene si ka ezahala. “Taha kwanu.”

112 Cwale, lu bona Joani, kauhanyo ya 2...timana ya 2. Mulemuhe, kapili, Joani na ekelize se:

Mi kapili... (Amen!)

113 Oh, haiba Ni eza ka lisheha, Ni ikutwa fela hande. Joani na ekelize:

...kapili Ne ni li mwa moya:...

114 Ha mu utwa Linzwi la Mulimu li bulela ku mina, sesiñwi sa ezahala. Amen! Oh, kana ne li ezahalile ku mina ona cwalo? Ne li ezize kuna, myaha ye seti-wani kwa mulaho, mi ha Ni si kaba ya swana kuzwa nako yani. Oh, fani ha Na ize, “Mutahe ku Na, kaufela mina muatezi ni milwalo yebukiti, Ni ka mifa pumulo.” Ya ni cinca.

115 Joani ali:

...kapili Ne nili mwa moya:...(Moya mañi? Ki Moya o Kenile. Oh!)...Ne nili mwa moya: mi, amubone, lubona lwa tomiwa mwa lihalimu, mi yomuñwi la ina fa lubona lwani.

116 Mwabona, Joani na siile lifasi cwale. Kreste na siile lifasi (mwa mufuta wa Moya o Kenile) mi na kutezi mwa Mubili hape. Kacenu Mubili uinzi ona kwani kuba kupuzo, kakuba sitabelo. Lu ka fita ku zona mwa kauhanyo ye. Kono Moya wa Kreste ukutela hape ku to pila mwa Keleke, ku to pila ku luna.

117 Cwale, kapili kasamulaho Amano bonisa mafelelezo a lusika lwa musebezi wa Hae fa, Aya kwa Lihalimu, Ki hali, “Ni ka ku bonisa se si ka ezahala kasamulaho wa se, kasamulaho wa masika a likeleke.” Ki hali, “John, Ha ni sa kona kubulela ku wena kwani ni kamuta, kakuli Ni zwile kulo fo, Ni tile ku pahama nyana. Akutahe kwanu ni Na!” Amen! “Mi Ni ka ku bonisa se si ka ezahala kasamulaho.” Oh, mawi! Hmm! Oh! Angelwa mwa pono, ku shimbiwa mwa Kanya.

118 Kutwisiso ya hae neilukela kuba sina ya Paulusi. Makorinte Babubeli 12:2 ni 4, haiba musweli kuñola. Makorinte Babubeli...2 kuisa fa 4. Paulusi na swelwi zazi leliñwi, mwa... a kena mwa pono, niyena. Kana mwa ziba cwalo? Mi abona lika ze ne sa swaneli nihaiba kubulela ka zona; lilimo ze lishumi ka zene, mane na si ka li bulela. Mwabona? Kono muteeleze shutano mwahala bona.

119 Sa na boni Paulusi, na hanisizwe ku bulela ka sona kamba ku si beya mwa sicaba. Oh, mawi! Ha ni lumeli kuli na ka eza cwalo. (Kakuli, musipili nyana o Ne ni ngile zazi leliñwi, Ha ni si ka fita kale ku ona mi hanina kuba ni kamuta.) Mwabona, na—na boni lika za na sa koni kubulela. Ni sepa kuli nasina manzwi a ku... na swelwi mwa Lihalimu la bulalu, mane. Mwabona, mwahalimu mwa Lihalimu la bulalu.

¹²⁰ Ki shutano mañi fani Joani ha ngelwa mwahalimu ni kubona Jesu, nali yena . . . Ali, “Ñola mwa buka so boni ni ku sifa kukuta, u si lumele kwa likeleke.” Paulusi na hanisizwe kubulela, mi Joani mane a kupiwa kuli a li beye mwa buka kuli li zamaye mwahala masika kaufela. Oh, mawi! Li patuluzwi cwale, kuli li patululwe mwa mazazi a maungulo a. Ne li si ka patululwa mwa mazazi a hae, li patuluzwi cwale halunze lu ya cwalo.

¹²¹ Oh, mi mulemuhe, Joani, amano shimbiwa kapili kasamulaho wa lusika lwa keleke, neli mufuta wa Keleke ye ngilwe. Kapili kasamulaho wa lusika lwa keleke kufela, Lusika lwa Keleke ya Laodesia loo, kona kutaha Kuungelwa. Keleke ya ngelwa mwahalimu sina Joani mwa nabezi, Fapila Mulimu. Oh, mawi! Whew! Seo si taza fela moyo waka mwa sibaka. Ku ngelwa mwahalimu, mwa Kuungelwa kwa Keleke! Mi I bulezi kuli . . . Sibaka se, Buka ya Sinulo, ne i ñozwi, mwabona, kwa mafelelezo a lusika lwa keleke.

¹²² Cwale, Nina ni taba nyana fa ye Ni bata ku tatulula hande kakuli ki sika se si bile teñi fa nako yetelele cwale mwahala Bakreste babañata. Mi Na hupula kacenu, hane Ni sweli kubala, kuñola Mañolo, ni kufumana mabizo ni mibala ye shutana ni lika zeñwi. Luka kena ku zona kasamulaho nyana, nambwamutalati ni lisupo, ni zeñwi cwalo. Ne ni sweli kuñola Mañolo fa ili kuli Ni kone kotalima kwa mulaho ni ku swanisisa ku ona, haiba Ni . . . ya ni zamaya cwalo. Kakuli, hañata, haiba Ne ni ka bulela fa nto yeñwi ye cwalo, Ne ni ka . . . ne ku ka shutana, Ne ni ka lika kuziba cwalo ka pilu. Kono ka nzila ye, hamuna ni fela nako yelikani, Ni tabela ku swanisisa ku ona kakuli li zamaelela hande ni Mañolo, kwa mulaho ni kwa pata.

¹²³ Cwale, mwa Mateu 16:13, lu fumana cwana, haiba musweli kuñola Mañolo. Mateu . . . Haiba mubata kukuta . . . haiba mubata kuapula kuyona, ku lukile, Mateu 16:13. Ki . . . Oh, luka kuta fela ni ku ibala, mi kipeto lukaba ni yona hande. Mateu kauhanyo ya 16, ni timana ya 13. Muteeleze hande cwale halunze lubala 16:13, “Pitrosi ha taha . . .” Kamba:

Mi Jesu ha tile kwa likamba la Sesaria wa Filipi, a buza balutiwa ba hae, ali, kana batu bali ki Mañi . . . Na nili Mwana mutu?

Mi se bali, Babañwi bali . . . ki wena Joani Mukolobezi: babañwi, Elia; ni babañwi, Jeremia, mane, kamba alimuñwi wa baplofita.

Mi ali ku bona, Kono mina muli ki Na mañi?

Mi Simoni Pitrosi a alaba mi ali, Ki wena Kreste, Mwana Mulimu yapila.

Mi Jesu a mu alaba ali ku yena, Ufuyozwi wena, Simoni Bar-jona: . . . nama ni mali ha li si ka ku patululela zona, kono ki Ndate ya mwa lihalimu.

Mi Ni li . . . ku wena, Kuli ki wena Pitrosi, mi fahalimwa licwe le Ni ka yaha keleke yaka; mi minyako ya lihele haina ku i koma.

Mi cwale . . . Mi Ni ka kufa linotolo za mubuso wa lihalimu: mi so ka tama mwa lifasi si ka tamiwa mwa lihalimu: . . . kaufela so ka tamulula mwa lifasi si ka tamululwa mwa lihalimu.

Mi a ekeza kwa balutiwa ba hae kuli basike ba bulelela mutu kuli kiyena Jesu Kreste.

124 Muteeleze hande cwale. Ku lukile. “Kakuli nako ne i kalile . . . Kuzwa ka nako yani Akala . . .” Ni bata kunga yeñwi, mwakona kuibala fafasi, munge timana ya 28 fa, kakuli mwakona kubala ze siyezi zateni ha muya kwa malapa.

Kaniti—niti Ni li ku mina, Kuna ni baba yemi mo, babasike ba bona za lifu, kufitela babona Mwana mutu ha taha mwa mubuso wa hae.

125 Oh, munahane ka zona! “Babañwi baba yemi fa, *babañwi* ba bayemi fa, habana kutatuba lifu kufitela ba bona Mwana mutu ha taha mwa Mubuso wa Hae.” Ha ki pulelo ni yeo! Mo muhanyezi atabela kungela seo ni ku si bonisa fela mwabezi ya kuzize, mwabona. Mwa latela kulemuha seo, mi si ezahalile mi hakuna se ne ba ziba ka sona. Mwabona? Ku lukile.

126 Kasamulaho wa buipuleli bwa Pitrosi, ili yo luziba kuli buipuleli bwa hae ki . . . Na ka yaha Keleke ya Hae fa licwe leliswana le. Isiñi Pitrosi, kuba licwe nyana, sina Katolika ya Roma ha lika ku bulelela cwalo. Kono buipuleli bwa Pitrosi bwa Sinulo, yeo kona Keleke. Mulimu uka Li patulula; isiñi buipuleli bwa muuna yo, kakuli kasamulaho wa zeo awa mwa tumelo. Isiñi buipuleli bwa Hae kakuba Mwana Mulimu; kakuli ne ba ziba kuli Nali Mwana Mulimu, Pitrosi na bulezi fela cwalo. Kono seo nesili sona, neli, Sinulo yene patuluzwi kuzwa kwa Lihalimu kuli Nali yena Mwana Mulimu. Ali, “Nama ni mali ha li si ka ku luta zeo, kono Ki Ndate ya mwa Lihalimu ya ku patululezi zona. Mi fahalimwa licwe le, buipuleli bwa licwe lani, Ni ka yaha Keleke ya Ka, mi minyako ya lihele haina ku i taseza . . . ku I koma.”

127 Ni sepa kuli haluna nako yeñata hahulu fa cwale, kuli lukone kukena ku zona. Mi lu bata kubona sani mo si bubela ku mutu. Ki likande lelinde ona fa haiba lukona fela kufita ku lona. Ku lukile. Eeni, mubulelelo, sa nali sona Pitrosi . . . Na ka yaha Keleke ya Hae fa buipuleli bwa Pitrosi. Na ize, “Babañwi baba yemi mo habana kutatuba lifu kufitela ba—ba bona Mwana Mulimu ha taha mwa Mubuso wa Hae.”

128 Cwale, muhupule, Na bulezi kuli “babañwi.” Yani na fitelela alimuñwi, nji cwani? *Babañwi* ne ba kaba babañata, “kufitelela alimuñwi.” Kono cwale mutalime, balutiwa ba Hae kaufela ne ba yemi fani, mi Na sweli kubuza mañi ni mañi wa bona, “Ki

sikamañi se mu nahana ka se? Mi ki sikamañi se mu nahana ka sani?” Kono Yena ali, “Kuna ni babañwi ba mina baba yemi mo, babañwi baba yemi mo, habana kutatuba lifu kufitela ba bona Mwana mutu ha taha mwa Mubuso wa Hae.” Oh, mawi! Ha ki pulelo ni yeo! Munahane, myaha ye likiti zepeli kwa mulaho yene bulezwi.

¹²⁹ Kana ikaba...kana...Kana Linzwi la Mulimu ha li palelwi? Linzwi kaufela la Na bulezi li ka ezahala na?

¹³⁰ Cwale, haiba lu bata, muapule mwa kauhanyo ya 17 ya Mateu ki yona yetatama. Ha Na ngile...Mazazi nyana kuzwa fani, A nga Pitrosi, Jakobo, ni Joani, kukambama lilundu, kusili, kuba paki. Pitrosi, Jakobo, ni Joani; mi ba bona Mubuso wa Mulimu utaha mwa mata, ne ba boni kutaha kwa Mubuso wa Mulimu ko ne ku libelezwi. Amen! Oh, ne ba tisizwe mwa ponahalo ya kubona Mubuso wa Mulimu ha u so pahami sina mo ne U tahela, ili ku shetumukela teñi kwa Mileniamu. Ne ba boni za yona.

¹³¹ Nako yeñwi yefitile...sikwata sa bakutazi, Oral Roberts neli alimuñwi wa bona. Cecil B. DeMilles, ha na ñozi *Milao Yelishumi ye*, a biza Muzwale Shakarian, Muzwale Roberts, bakutazi babañata mwabuse bwa naha, mukutazi kaufela wakona kutaha, mi aba mema kutaha mwa sibaka sa lituto siswaniso si si ka lukululwa kale, mi ba li lumeleza kubona lipakiso za zona li si ka bonahala kale, hane basweli kulifisa mali aeza madollar a twenti-faifi fa tikiti. Kono yena...Ne ba boni makalelo a yona, kuli ba kone ku fitelela minahano ya bona kamba nekuna ni muhanyezi yomuñwi ka zona kamba ze ne ka bulelwa, ni zeñwi cwalo. Ne ba li sicaba si si ka libona kale.

¹³² Mi Jesu ali, “Babañwi ba mina baba yemi mo” (Amen!) “hbana kutatuba lifu kufitela ba bona Mubuso wa Mulimu utaha mwa mata,” kamba, “kubona Mwana mutu ha taha mwa Mubuso wa Hae,” nitaluse. “Mubone Mwana mutu ha taha mwa Mubuso wa Hae!” Mazazi nyana kuzwa fani, Anga Pitrosi, Jakobo, ni Joani, mi ba ya kwa lilundu le litelele, mi ki Yani a fetuha fapila bona. Lizazi, le li benya, halikoni kuba sina liapalo za Hae za Na apezi. Ki linako zekai ha lu fitile kuzona mwa linguli, ne lu ka li latelela mwa Bibe!e!

¹³³ Mwakona kunga palo iliñwi ya Mañolo ni kutama Bibe!e kaufela hamoho ni yona. Eeni, sha. Hakuna nihaiba buhata kai ni kai! Kaufela zona li matehilwe ka mata a Mulimu. Diabulosi hakoni kuicocomezwa mwateni ha bata kueza cwalo. Yeo ki niti. Hakoni kukena mwahala sicaba se si kenile se si beile bupaki bwa sona kwande kwani ni kulumela mwa Mubuso wa Mulimu, ni kunga Liñolo kaufela ni ku Li mateha ka mata a Moya o Kenile, a Li tapisa mwa Mali; lifasi halikoni kukena ku lona, diabulosi hakoni kukena ku lona. Ba shwile, bupilo bwa bona bu patilwe ku Krete ka Liswayo la Mulimu, ka Moya o Kenile.

Kana diabulosi uka ba bilaeza cwani? Hmm! Ki bani fani, mwa buino bo cwale.

134 Mwa sibaka se, mi, abona Kutaha, kamba kuitukisa kwareni. Mi ki sikamañi sapili, sa na boni . . . nto ya na boni? Nto yapili ya na boni mwa Kutaha neli Mushe, ne yemela bahalalehi baba shwile bene ba ka zuha. Elia na yemi fani.

135 Oh, Ni bata kuli mulemuhe se si ka ezahala. Neku na ni Mushe, pili; ani kona masika a silezi a kaufela one ba lobezi, masika a likeleke ze silezi. Ha ki seo fela, kono Elia nali teni; mulumiwa wa lizazi la mafelelezo, ni sikwata sa hae, sa ku fetulwa, ki Kuungelwa. Amen! Cwale kwapili; ne ku libelezi Kutaha.

136 Mi ki sikamañi se ba eza kaufela . . . ? Kaufela ne ba kopani ni Yena. Oh, mawi! Neli sikamañi sani? Sepiso ya Hae ku Pitrosi, Jakobo, ni Joani, ne i talelelizwe. Yeo ki niti. Kakuli Na ize, “Babañwi baba yemi mo habana kutatuba lifu kufitela ba bona yena Mwana mutu ya taha mwa Mubuso wa Hae,” mi ba bona buitukiso bwa teni. Mi kasamulaho wa se, kasamulaho wa zuho . . .

137 Ni tabela ku mi tiseza nto yeñwi; kasamulaho Jesu amano shwa, kupumbekwa, ku Muhalalehi Joani 21:20. Muhanyezi yomuñwi na kalile mwa lizazi la pili. Ona fo lu sa inzi mwa tuto, halu li keniseni. Ku Muñoli Joani 20:21, Jesu na kopani ni balutiwa ba Hae, aba fepa litapi ni sinkwa fa mulilo. Mi hane baya fa likamba, Joani a yendamena fa sifuba sa Hae; mi Pitrosi a buza puzo, ali, “Ki sikamañi se si ka ezahala ku muuna yo?” Jesu na lata Joani, Joani neli muuna wa lilato. Mi ki hali, “Ki sikamañi se si ka ezahala ku muuna yo? Ki sikamañi se si ka ba mwa bunduna bwa hae? Ki sikamañi se si ka taha kwapili?”

138 Mi Jesu ali ku bona, “Ki sikamañi ku mina haiba a ina kufitela Ni kuta, kufitela Ni kuta? Ki sikamañi sani?”

139 Mi balutiwa ba eza mafosisa, ne ba bulezi kuli “Jesu na bulezi kuli—kuli—kuli ‘na ka pila kufitela Kutaha.’”

140 Kono Jesu na si ka fosa. Ona mwa Sinulo mo, kauhanyo ya 4, Kreste na bulukile Linzwi la Hae! A tisa Joani mwa Lihalimu mi a fetula lika kamukana ku yena. Kanya! Na—na boni mubonahalelo wa makalelo. Na li boni fela inge kuli na pila mwa lifasi mi abona masika a likeleke kaufela ha na to ezahala, kutaha kwa Mulena, Buka kaufela ya Sinulo. Oh, mawi!

141 Mwabona kana lisepiso za Hae mo li bezi ze ipitezi? Cwale, mu ketilwe . . . Jakobo kueza cwalo; Joani, ufi wa bona kaufela; na si ka lumeleza nihaiba Paulusi kuli alibone, kubulela, hakuna.

Ki hali, “Ki sikamañi ku wena haiba a liyeha kufitela Ni taha?”

142 Mi ka kuba kuli ne ba bulezi cwalo, Na ketile fela Joani mi amunga ni ku mu bonisa lika kaufela mane a si ka shwa kale, inge kuli na pila ka zona. Amu bonisa mo ne kuka bela! (Muzwale Pat, ha ki nto yende yeo?) Oh, mwabona, amu nopa hande. Ona fa, kauhanyo ya 4 ni timana ya 2, ya paka cwalo. “Na mu bonisize lika ze ne liteni, ze liteni, ni ze ka taha.” Na mu bonisize lusika lwa keleke, kutaha kwa Majuda, kusuluha kwa likoto, Kuungelwa, ni Kutaha hape, ni Mileniamu, ni Munzi wa Kuyakuile wa baba pilisizwe ba Hae; inge fela mwa na pilezi mwahala lika kaufela, mi a li bona kaufela ha li ezahala. Mwabona? Mwabona? Na mu nanuzi fela ni ku mu bonisa si—si—si swaniso sa Na sweli ku pikulusa, ha bone taba yateni kaufela ha i lila. Oh, mawi!

143 U swelwi. U talelelize sepiso ya Hae mwa—mwa Sinulo 4:2. Mane lifu la hae a si ka ngelwa kale mwa Moya ni kubona lika inge kuli na pilile. Na—na li boni kaufela hali fitiswa mwa buitukiso. Kacwalo a bona, mwa pono, ona cwalo fela ze ne ka ezahala mi ki sikamañi sene si ezahalile fa lifasi kuzwa ka nako yani kufitela kutaha kwa Mulena Jesu. A mu bonisa zona mwa pono.

144 Kacwalo he balutiwa . . . kamba hakuna ya kile abulela kuli Na bulezi kuli Uka taha mwa lusika lwani. Ki hali, “Ki sikamañi ku wena haiba, (ka mukwa usili), haiba a liyehanga kufitela Ni taha?” Mi ki Ha muisa fela ku yo kutisa sesiñwi ku yena ni ku mu bonisa sene si ka ezahala. Oh, Na lata fela cwalo. Hmm. Oh, mawi!

145 Mulemuhe cwale, ha lu boneñi kuli neli sikamañi se:

Mi kapili Na ba mwa moya: mi, amubone, lubona lwa tomiwa mwa lihalimu, mi leliñwi la ina fahalimwa lona, fa lubona.

146 Nekuna ni “Linzwi” lene li mu bizize. Oh, Linzwi lani! Oh, Ni palelwa kuzwa ku zeo, Linzwi lani la Yani mwa mulaho wa hae. Mi atalima kwa ni kwa, mi A mu bonisa masika a likeleke kaufela, kakuli na yemi *mwa* masika a likeleke, malambi a sebene a gauda. Mi ki ha utwa Linzwi lani kasamulaho wa masika a likeleke kufela; Linzwi lani la zwa mwa lifasi, la ngelwa mwahalimu. Ha Na keni mwa Kanya, a Mu utwa inza li, “Taha kwanu! Ni ka ku bonisa se si ka ezahala kuzwa fa kasamulaho.” Oh, mawi!

147 Linzwi lani! Ha lu amboleñi fa Linzwi lani fa muzuzu; Nina ni Mañolo añozwi faa. Ha lu yeni kwa Matesalonika Bapili 4, mi lu teeleze fela fa se li ka bulela Linzwi le. Oh, kaufela lwa ziba se Li ka bulela, kusina . . . lusika bala kale, nji cwani? Lwa ziba se si ka ezahala. “Tolombita ya Mulimu ika lila mi baba shwile ku Krete ki ha ba ka zuha.” Kana ku cwalo? Mina babasweli kuñola, mwa Matesalonika Bapili 4:16 ni 17, “lona

Linzwi,” Linzwi lani neli Linzwi la Kreste. Kana ku cwalo? Linzwi la Kreste!

Kakuli . . . tolombita ya Mulimu ika lila, mi baba shwile ku Kreste ki ha ba ka zuha pili:

. . . luna baba pila mi lusiyala luka ngelwa hamoho ni bona . . . ku yo katanyeza Mulena mwa mbyumbyulu: mi kamita ikaba ni Mulena.

148 Lona Linzwi leli swana lene li bizize Joani kuli, “Taha kwanu,” lona Linzwi leli swana lene li bulezi ku Joani kuli, “Taha kwanu,” ki Linzwi le li swana le li ka biza Keleke zazi leliñwi (Amen!), ku biza Keleke.

149 Hape, lona Linzwi leli swana lene li bizize Joani kuli akambame, ki Linzwi le li swana lene li bizize Lazaro kuzwa mwa libita, lona Linzwi le li swana lani la lingeloi lelituna. Kreste ki yena Linzwi la lingeloi lelituna, “Linzwi la lingeloi lelituna,” mwabona. Oh, Linzwi la tolombita ya Kreste ne li to biza Joani kuli atahe, lona Linzwi le li swana lene li bizize Lazaro. Kana mwa ziba kuli fa libita la Lazaro, Na bulezi ka Linzwi le lituna. (Isiñi fela kuli, “Lazaro, zwa mo.”) “Lazaro, zwa mo!” Ne li mu biza kuzwa kwa bafu.

150 Mi a alaba, “Kina Yo.” Mi a zuha kwa bafu, kasamulaho amano shwa mi mubili wa hae wa bola.

151 Lona Linzwi le li swana lani la li ku Joani, “Taha kwanu, Ni ka ku bonisa lika zeñwi ze ka ezahala.”

152 Lona Linzwi le li swana lani li ka utwahala foo baba shwezi ku Kreste ha ba ka zuha, “Kakuli tolombita . . .” Ki tolombita! Tolombita ki sikamañi? Ki Linzwi la Kreste, lona le Liswana lene li mu bizelize kukambama. Na utwile Linzwi inge mulumo wa tolombita le lili, “Taha kwanu u kambame!” Mwabona kamo zuho ikabela? Ikaba mwa nako nyana, ka ku koba kwa liito. Ona Linzwi le li utwahala hande lani, mi Uka biza Keleke, kubiza, “Amuzwe ku zona.” Ona Linzwi lelituna le lbiza lani. Mulimu, ni tuse ku Li utwa zazi lani.

153 Sina ha Ni bile ni bulelanga hañata kuli . . . Na ziba, kakuba mutu ya shwa, Rodney, Ni ziba kuli kuna ni sikwalo sesituna se si nsu se si beilwe fapila ka, si bizwa lifu. Nako kaufela pilu yaka ha inata, Ni sutelezi bukaufi ni kunata kwa mafelelezo fa munyako wani. Leliñwi la mazazi aa Ni lukela kukena ku zona. Kono ha Ni lati kukena inge lipyeha, kuhuwa ni kuhuwa ka sabo. Ni bata kukena ku se, nze ni apezi liapalo za kuluka kwa Hae, ka kuziba cwana: kuli Na Mu ziba mwa mata a zuho ya Hae; kuli zazi leliñwi Ha ka biza, Ni ka zuha mwahala bafu; mi Ha ni bizeza kwa Lihalimu, foo tolombita ya Mulimu haita lila mi baba shwile ku Kreste ki ha ba ka zuha, haiba Na pila, Ni ka cinciwa mwa nako nyana fela, ka kukobya kwa liito, mi ni kaya ni babañwi ba bona, ku yo katanyeza Mulena mwa mbyumbyulu.

Linzwi la tolombita lani, li utwahala hande, ka mulumo. Hmm. Oh, ikaba nto yeswana, ka kuswana ni Kutaha kwa Hae.

154 Hakuna mulumo o sa ketehani ka Zona. Nekusina sika se si sa ketehani ku Joani hana utwile Linzwi lani hali, “Taha ukambame!” mi ki ha taha. Amen.

155 Fani Lazaro, mwa bafu, mwa libita; ni moyo wa hae, mazazi amane no so yambaelela kusili, Ha ni zibi ko ne inzi, Ha ni sepi kuli kuna ni yomukana wa luna yaziba. Kaufela ko ne u inzi, ne kusina shutano ni yekana. Na file fela pizo iliñwi ku mutu yo likokwani za mubili ne li ca mubili wa hae; kununka, mwa libita. Ona Tolombita ye utwahala yani yali, “Lazaro, zwa mo!” Mi muuna, ya na shwile mi a bolile, a inyunga mi a zwa mwa libita, inza zamaya. Hakuna ze ni kakanya ka zeo, nji cwani, mizwale? Hakuna tuso ya kueza cwalo!

156 Ki nto yeswana busihu boo, ha ku bulela Linzwi le li utwahala hande kuli, “Muezalibi, baka, Ni ka kufa Bupilo Bobusafeli.” Mubake, mañi ni mañi wa mina, mi mu kolobezwe ka Libizo la Jesu Kreste kwa swalelo ya libi za mina, mi mu ka amuhela mpo ya Moya o Kenile. Zeo kona lipizo. Hakuna ze ni kakanya ka Zona.

157 Ni paki kuli Ki niti. Kuna ni lipaki zeñwi, ma milioni a bona mwahala lifasi kacenu, bo ki bupaki kuli ki Niti. Mi Bibehe ha i taha, Manzwi a Mulimu, Linzwi la Mulimu kaufela ki tolombita. Mulumo kaufela wa Linzwi ki tolombita, ki tolombita ya Evangeli. Mi ha I lila, ki yona Niti. Hane I bulezi kuli, “Jesu Kreste, yena wa swana maabani, kacenu, ni kuyakuile,” hakuna sa ku kakanya ka Sona. Ki ya swana! Eeni, sha.

158 “Mubake, mu kolobezwe ka Libizo la Jesu Kreste, mu ka amuhela mpo ya Moya o Kenile.” Hakuna za ku kakanya ka Sona.

159 “Ya utwa Manzwi a Ka mi alumela ku Ya Ni lumile una ni Bupilo Bobusafeli. Ya lumela ku Na, ni ha shwile uka pila hape. Ya pila mi a lumela ku Na hana kushwa. Kana u lumela cwalo?” Hakuna za ku kakanya ka Sani, “Uka pila!”

160 “Ya ca nama ya ka ni kunwa Mali a ka una ni Bupilo Bobusafeli, mi Ni ka mu zusa ka lizazi la mafefezezo.” Hakuna za ku kakanya ka Sona; hakuna; Ki mulumo o ketehana hande.

161 Oh, Na Li ziba, Ne ni Li utwile ha li utwahala mwa pilu yaka ya si Irish zazi leliñwi, na, nili muezalibi wa kale. Ne li ka ni ezeza cwani? Kono Ne ni lumela kuli Ne li muhuwo o munde, Ne ni Li amuhezi. Ni paki kuli Ki niti.

162 Zazi leliñwi Uka biza hape, lu ka zwa mwa lifasi. Kakuli hakuna mulumo o sa ketehani ka tolombita *yani*. Eeni, sha. Eeni, sha, hakuna mulumo o sa ketehani, ka nako kaufela.

163 U utwahala kacenu Ha lu biza, ki nto yeswana fela Ha lu bulelela sika kaufela.

164 Cwale, ha lu kuteleñi fa timana:

Mi cwale. . . amubone, lubona lwa tomiwa mwa lihalimu, (timana ya 2) mi yomuñwi a ina fateni.

165 Mulemuhe, “Lubona,” Na inzi fa Lubona. Na si ka kuta hape mwa likandela cwale, fa lifasi. Kuungelwa ne se ku ezahalile kale. Nali mwa Kanya, inza inzi fa Lubona lwa Hae. Ni bata kuli mulemuhe kushetumuka cwalo, lu ka fumana neba mwa kauhanyo ya 5, ne si Lubona lwa sishemo. Ne si Lubona lwa sishemo ni hanyinyani, neli Lubona lwa katulo. Ne si Lubona lwa sishemo, ki Lubona lwa katulo kakuli mulilo ni mamonyi ni mishika ya utwahala ku lona; hakusana hape, sishemo si felile, lusika lwa Keleke lu felile. “Ya masila abe ya masila ona cwalo; ya lukile abe ya lukile ona cwalo; ya kenile abe ya kenile ona cwalo,” hakusana Lubona lwa sishemo.

166 Busihu boo, Mali ateni fa Lubona mi ki sipula sa sishemo ku muezalibi kaufela ya bata sishemo. Kono ka lizazi lani, haina kuba sipula sa sishemo he, ikaba sipula sa katulo ni Mulimu ya buhali ukaina fateni. “Mbali. . . Haiba ya lukile upiliswa katata fela, muezalibi ni ya si ka luka uka yo yema kai?” Mane Ha taha mwa malu a kanya ya Hae, malundu aka lika kufumana sibaka sa kuipata ku sona. *Luna* lu ka ina kai, kanti?

Oh, ki sibuba kwa bunde sani
Se si ni kenisa sina litwa;
Ha ku na siliba se Ni ziba,
Hakuna kwanda Mali a Jesu feela.

167 Oh, mawi, ha ki tuto ni yeo! Hakuna mulumo o sa ketehani!
Ni Lubona lwa Hae:

. . . *mi Aina fa lubona lwa Hae. (Hasana kubateni fa.)*

168 Cwale, yeo ki nto isili, ki bupaki bwa kuli Keleke i ngelwa kusika ba kale Nyandiso Yetuna. Mwabona? Kiñi? Ki Yo fa Lubona mwa Kanya, mi Keleke iicongile, mi kona kutaha mwa Nyandiso.

169 Ne ni bulelanga kamita kuli mwa mazazi a Nuwe, Nuwe nali mwa areka ku si ka nela kale pula. Lota nazwile mwa Sodom mulilo usika suluha kale. Mi Keleke ikaba mwa Kanya kusika wa kale kutuka kwa atomic. Yeo ki niti, kusika wa kale atomic.

170 Muli, “Kucwani ka yani yapili?” Neli kwa mahedeni, isiñi Bakreste.

171 Cwale, mulemuhe. Oh! U felize musebezi wa Hae mwa lifasi mi U ngile Keleke ya Hae, mi cwale U luma katulo. Lifasi ne li Mu hanile, mi A luma katulo ya Hae. Yena ni Keleke ya Hae baile kwa Kanya.

172 Joani, fani fa sooli sa Patmosi, musinuli kwa keleke, ibile mufuta wa Keleke ye nanuhezi mwa Kanya, “Taha kwanu!” Kubonisa . . .

Mu li, “Na yemela Keleke?”

173 Ku mutu kaufela ya utwa Linzwi le, Joani na mu yemela. Amen! Joani nali muyemeli wa Mali a Jesu Kreste, bupaki bwa Linzwi. Nali paki ya kolobezo ya Moya o Kenile, ni kutwano ya butu ni Kreste, mi na yemela Keleke kaufela; kuli, muuna kaufela kamba musali, mushimani kamba musizana yakile alumela ku Kreste, a Mu amuhele ka mayemo a swana, uka bizwa zazi leliñwi kuli, “Taha kwanu!” u ngelwa kusikaba kale Nyandiso. Muhupule, nako ya Nyandiso haisika kwana kale.

174 Ye ki yona nako, ye tomilwe ya katulo. Joani usweli ku boniswa cwale se si ka nga sibaka mwa mulaho wa lusika lwa Keleke. Mwabona? Kacwalo, neli ona cwalo.

175 Cwale, mulemuhe hape mwa timana ya 3, kamba ya 2, “Lubona lwa tomwa mwa Lihalimu, mi Alimuñwi aina fa Lubona.” Cwale, ona Moya o swana onoli mwa lifasi, no zwile mi no ile kwa Kanya, mi na inzi (yena Jesu yaswana yali ni luna busihu boo) mwa sishemo, na sa ile kwa Kanya mi uina fa Lubona.

Mi yainzi fa Lubona na bonahala inge licwe la jasper ni . . . la sardia: mi nekuna ni nambwamutalati yene tinguluka lubona, mwa meto inge ya emerodi.

176 Ni ka tuhela, kakuli kuna ni mizwale yemiñwi ye swanela ku kutaza.

Mwendi Ni ka nopa taba ye kakusasana, ona kwanu. Mi kacwalo, “ku bonahala sina emerodi.” Oh, mawi! Oh!

Kuna ni batu kwa libaka kaufela,
Be lipilu za bona za tuka mulilo (Kana ha mu
lati cwalo?)

. . . Mulilo o no wile la Pentekota,
O ba ktapisize ni ku ba eza baba kenile;
Oh, Usweli wa tuka cwale mwa pilu yaka,
Kanya kwa Libizo la Hae!

Ni tabile hahulu kuli Ni kona kubulela kuli Ni
alimuñwi wa bona.

177 Joani, na bizizwe ni ku kobetiwa ki Mulena Jesu, na sepisizwe ki Mulimu kwa mulaho kwani kuli na ka bona kutaha kwa Mwana mutu. Pitrosi, Jakobo, ni Joani, ni bona inge bayemi kwani, fani Jesu ha na ambola ni bona ni kubulela kuli, “Kuna ni babañwi baba yemi mo babasike ku bona za lifu kufitela ba bona Mwana mutu ha taha.” Na si ka bulela kuli *kaufela* be ne ba yemi fani, kono *basikai*. Mi ba ya, mazazi nyana kuzwa fani, mi ba bona buino bwa zuho ha i ezahala, ni kutaha kwa Mulena.

178 Elia na yemela ba bakenile baba shwile. . . Ni talusa Mushe, ni bene ba zuhile. Elia na yemela sikwata se si ngilwe. Muhupule, Mushe neli wapili, kona kutatama Elia. Elia na lukela kuba mulumiwa wa lizazi la mafelelezo, kuli ka yena ni sikwata sa hae

ne zuho itahe . . . ku ka taha . . . kihande, ku ka taha Kuungelwa, Ni taluse. Mushe na tisize zuho mi Elia a tisa sikwata se si Ngilwe. Mi, kwani, sibeli sa zona ne li yemelwa ona fani.

¹⁷⁹ Mi kasamulaho nyana ba lemuha, mi ba bona, mi Pitrosi ali, “Ha lu yaheñi litabernakele zetalu. Mutuhele kuli babañwi ba ye mwatasa mulao, mi babañwi ba zamaye mwatasa Elia, mi haluyeni kwateni (babañwi ba bona) neku *le*.”

¹⁸⁰ Mi hane ba sa bulela, Linzwi la bulela mi lali, “Yo ki Mwana Ka ya latwa, mu Mu utwe.” Mi ha ba talima, ba bona Jesu fela, lika kaufela za felela ku Alimuñwi. Oh, mi Nali yena Liseli, yona Niti, ona Nzila, ona Sikwalo, ona Nambwamutalati.

¹⁸¹ Oh, kamuso luna ni tuto yetuna, haiba Mulena alata. Kamuso lunga “likatulo”; lunga “licwe la sardisi,” mwabona se li yemela, kona siemba se ne li ezize. Mi lunga kuli—kuli—kuli “jasper” ni kunga . . . macwe a shutana kaufela, mi lunga litaba ze kaufela mwahala Ezekiele, kukutela mwa Genese, kukutela mwa Sinulo, kutaha mwahala Bibebe, ku li tamahanya hamoho, ona macwe a shutana a ni mibala, ni zeñwi cwalo. Mi kipeto lu ka li kutisa hape ku zani ni kubona haiba zeo ha li cwalo. Mwabona? Mubone haiba ha ki mubala o swana ni lika kaufela, ki nto yeswana fela. Mi Moya o Kenile o swana, yena Mulimu ya swana, inza bonisa lisupo ze swana, limakazo ze swana, inza eza lika ze swana ka mwa Na sepiselize!

¹⁸² A bulelela Pitrosi, Jakobo, ni Joani, ni babañwi inge ba yemi fani, balutiwa ba Hae kaufela, ali, “Babañwi ba mina habana kubona lifu kufitela ba bona Mwana mutu inza taha mwa Mubuso wa Hae.”

¹⁸³ Ali ku Joani, ali . . . Pitrosi ali, “Ki sikamañi So ka eza ni yena? Yena . . . Yena—yena mutangana yani, ki sikamañi se si ka ezahala ku yena?”

¹⁸⁴ Na ize, “Ki sikamañi ku mina haiba a Ni bona inza taha?” Mi A mu lumeleza kupila kuli abone! Kasamulaho baba siyezi ba bona ne ba shwile ni kuya, Joani a pila kuli abone kutaha kwa Mulena ha kuboniswa mwa mata, sibaka kaufela si tomilwe kuzwa ka nako ya hae kufitela Katulo ifela mi Mileniamu ya kalisa. Joani na boni siemba sa zona kaufela, ni Mileniamu ha se ifelile, mi Lusika lwa Mubuso lwa kala. Kacwalo U buluka Linzwi la Hae, nji Cwani?

¹⁸⁵ Lu ka iñola fa timana ya 2. Mulena ha lata, lu ka kalela timana ya 3 kakusasana.

Halu inamiseni litoho zaluna.

¹⁸⁶ Ki babakai busihu bwa kacenu, mwa keleke ye, baba ziba, muzwale waka, kuli, (kezeli), kuli mu ka bizwa zazi leliñwi, kamba mu itukisize kamba nee? Kamba u i tukisize kamba kutokwa, u ka bizezwa ku yo kopana ni Mulimu. Tolombita yani ika lila; mi hase ililile cwalo, ika lilela kutisa katulo ku

mina, ko musike kupila hape mi mu ka nyandiswa mwa musima wa diabulosi wa lihele mwendi mwahala myaha ye likana ma milioni a myaha, kamba i ka mi bizeza kwa Lihalimu ku yo katanyeza ba Bakenile ba kanya.

¹⁸⁷ Ona cwalo fela sina Mulimu mwa na bulukezi Linzwi la Hae ku Pitrosi, Jakobo, ni Joani; ona cwalo fela sina mwa Na Li shimbululezi ku Joani yena mulatiwa, yena musinuli; ona cwalo fela sina mwa Na tomezi sepiso ya Hae mwahala masika a likeleke; ki niti luli kuli Na sepisize mwa mazazi a maungulo a kuli U ka luma pula ya mwa mulaho ni ku kutisa Moya o swana onoli fa lifasi ku Yena, Liseli li ka taha mwa nako ya manzibwana ni ku bonisa Mata a swana, lisupo ze swana, ni lika kaufela za Na ezize mwa lizazi la Hae Na ka li bonisa hape mwa “Sikwalo se si kwaluhile” mwa lizazi la mafelelezo.

¹⁸⁸ Ki Se fa! Luna ni Sona cwale, ona Moya o Kenile, Jesu Kreste, yena ya swana maabani, kacenu, ni kuyakuile. Mina mu. . . Ki kukutaza ku mina, Ki tuto ku mina, Ki kulika ku mibonisa se si lukile ni se si fosahalile. Ki Moya o Kenile Kasibili o bulela ka milomo ya batu, o beleka mwahala batu, kulika kubonisa sishemo ni muhau.

¹⁸⁹ Mi ha mu si ka Mu amuhela kale, mi ni fa busihu bwa Silimo Sesinca se kikuli mutabela kunanula mazoho a mina ku Mulimu ni kubulela kuli, “Mulimu, ha lu boneñi ni amuhele Mata anali ku Joani musinuli, kuli ha Ni biziwa Ni ka bonahala fapila Hao mwa kozo sina mwa na ezelize”? Nanula lizoho la hao. Mulimu ami fuyole. Mulimu ami fuyole. Mwa keleke kaufela. Mulimu ami fuyole. “Mutuhele ni itukiseze ku alaba lipizo zaka.”

¹⁹⁰ Ndata luna yakwa Lihalimu, ka lizazi la kukena mwa Silimo Sesinca. . . seli fela liholo zepeli cwale mi li ka fela, ku ikaba mwaha o munca. Se lu ezize mwaha wo lu si ezize. Lika zeñata ze Ni ezize, zani, Na swaba; Na li bakela, Mulena.

¹⁹¹ Mi kuna ni zeñata hahulu ze Ni ezize kwa mizwale baka babañata ze ba si ka utwisisa. Buñata bwa mizwale yaka kwande mwa masimu ha ba utwisisi libaka le Ni ezelize cwalo. Kono, Ndate, Ni ezize cwalo kakuli Ne ni etelelwa ku li eza. Na lapela, Ndate, kuli Hauna ku ni lumeleza ku swabela zamaiso yeo. Kono u ni etelele, Mulena, ku zwelapili kueza mo Ni zamaiselizwe kueza. Ni tuse, Mulimu, kakuli Ni bata ku sepahala ka kuziba tato ya Hao, kuli Ni kone kueza cwalo ka kutisa (sina ha No ni bonisize myaha yemiñata kwa mulaho hane Ni zwile mwa keleke ye) Sinkwa sa Bupilo kwa sicaba sa lifasi. Hane Ni boni lilundu lelituna la Sinkwa lani, ni Babakenile baapezi ze sweu kuzwa mwa lifasi kaufela ku to ca Sinkwa sa Bupilo se. O Mulimu, tuhela kuli—O Mulimu, nisike na be, nipalelwa kufepa sicaba fa Sinkwa sa Bupilo.

¹⁹² Fuyola mioya ye lapile ye mo ye nanuzi mazoho a yona cwale. Ba bata Bupilo bo buñata. Ni lapela kuli U ba taze ka Moya o

Kenile, Mulena, mañi ni mañi wa bona. Mulimu, lumeleza cwalo. Ba fe limbuyoti. Tusa mizwale ba luna, kai ni kai.

¹⁹³ Fuyola mizwale yaluna ye sebeza ye libelezi kutaha hape, cwale mwa mizuzu yelikani, babañwi ba ka bulela kukutaza. Lu lapela kuli ba fe Sinkwa sa Bupilo ku luna busihu boo, Ndate, halunze lu teezeza ka tokomelo ni ka likute kwa kuutwa Linzwi. Lumeleza cwalo.

¹⁹⁴ Lu fuyole. Mi cwale mwaha o munca wo utahe ka sepo yenca, kutisa milelo yenca, sinulo yenca, mata amanca, oh, lika kaufela. Ha li fiwe ku luna hape, Mulena, kwa limbuyoti za Hao ni lisepiso. Luipa ili luna, ni tapelo ya luna, mwa mazoho a Hao. Ka Libizo la Jesu Krete. Amen.

Ni itumezi, mizwale yaka ni likezeli.

¹⁹⁵ [Muzwale Neville wa bulela: Na sepa lwa kona ku nyakalala kaufela haluna ze lu akufela ni hanyinyani mi nelukaba baba tabezi hahulu kuswalelela fela kuteeleza ku Muzwale Branham busihu cwana ha nza lu shaele liñusa lee. Mi ki Liñusa le li lu susueza kakuli lu ziba kuli Mulimu u ku Lona. Amen.] Kulumbwe Mulena!

¹⁹⁶ [Mi ka Sa bulezi Uka kona ku si peta mane kufitela kutaha kwa Hae hape.] Eeni. [Mi Uka eza cwalo, isiñi zeo fela, Na linako zeñata ni bulezi kuli. . . lu bulela linako zeñata kwa batu, “Kana wa lumela kuli Jesu Krete wakona kuku folisa?” mi, eeni sha, mwakona ku ba tusa kuba ni sa kubulela fateni. Kono taba yateni ki kuli, “Kana u lumela kuli Wa ku folisa *cwale*?”] Amen! [Mi fokuñwi batu bali, “Kihande, Ha ni zibi.”]

¹⁹⁷ [Kalibe ya sa zo timela fela kwa sipatela, na ilo mu bona, nali, “Kezeli, kana u sa lumela kuli Jesu wa pilisa?”]

[Musali ali, “Eeni, Na lumela.”]

[Se nili, “Kana u lumela kuli Jesu Krete wa folisa?”]

[Musali ali, “Eeni, sha, Na lumela.”]

[Se nili, “Kana wa lumela kuli Wa ku folisa *cwale*?”]


[Musali ali, “Zeo ha Ni zibi.”]

[Mi se Nili, “Kezeli, wa kona ku ziba kakuli sepiso i ku wena.”] Amen! [Amen. U file sepiso.]

¹⁹⁸ [Cwale, halu kabe luteeleza ku yomuñwi wa mizwale ya luna mo. Luna ni zeñata nyana fa ni fa. . . Busihu bwa kukena mwa Silimo Sesinca, haluna tukiso ye tomilwe hande. Lu taha fela hamoho mi Mulimu a zamaye sina Mwa zamaiseza ni ku etelela.] Amen! [Mi mwa ziba, seli nako yetelele fo lu utwezi Muzwale Pat Tyler kuli afe bupaki bwa hae kamba kaufela sa beile Mulena fa pilu ya hae. Mi lu ka kupa Muzwale Pat kuli atise kaufela seo Mulimu a beile fa pilu ya hae.]

¹⁹⁹ [Kono a si ka taha kale, muzwale yomunde wa Mukreste kwa mulaho kwani, Muzwale Randall Hyman, mi uteni mo mi una ni

talenta ya Mulena ya kuopela mi mwa ziba, Ni lakaza fela kuli akone kuitusisa talenta yani kwa Kanya ya Mulimu, kacwalo Ni ka kupa Muzwale Randall haiba na ka taha ku to lu opelela. Akile aopela fateni hañwi kamba habeli mo mi ni ka mu kupa kuli aitusise talenta ya hae hape busihu boo ku Mulena Jesu, haiba uka kona. Haiba uka taha cwale ku to lu opelela. Una ni babanca kwa mulaho kwani basweli ku tokomela, kono mwendi ananuhe cwale a to lu opelela.]

²⁰⁰ [Ha sweli kueza cwalo, hape luna ni Muzwale Kinder kwa mulaho kwanu, muzwale ya latwa wa Pentekota, lu tabile ka yena. Mi luna ni Muzwale J. T. Parnell kwa mulaho kwani kokuñwi, Ni sepa uinzi kwa mulaho kwanu mwa mukoloko wa fande. Mi ki tabo luli kwa mizwale yeminde ya Bakreste ba kaufela yee,] Beeler *fani*. [mizwale ba tumelo. Mi halu boneñi,] Muzwale Beeler uteni kwa mulaho *kwani*. [Muzwale Beeler uteni kwa mulaho *kwanu*, hape. Eeni. Muzwale Beeler uteni kwanu ni . . .—Mu.] 

SINULO, KAUHANYO YABUNE KALULO YA I LOZ60-1231

(Revelation, Chapter Four Part I)

MUKOLOKO WAZA SINULO YA JESU KRESTE

Liñusa le ka Muzwale William Marrion Branham, neli kotalizwe lwa pili mwa Sikuwa la Pelekelo manzibwana, Ñulule 31, 1960, ili fa Branham Tabernacle mwa Jeffersonville, Indiana, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatizwe ni ku hasanyiwa kiba Voice Of God Recordings.

LOZI

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitususwe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangeli ya Jesu Kreste. Buka ye hailekisiwi, kuatiswa mwa buñata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa mashelēni ku sina tumelelano niba Voice Of God Recordings®.

Ka litaba zeñata kamba ka libuka zeñwi ze liteni, shangwe muñolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org